


九五五



要而其義在尊王黜僭誅亂賊  
而大復讐故曰裔不謀夏夷不  
亂華萬世之防廩：焉五胡北  
魏雲擾相仍然中國正朔尚有  
屬自蒙古篡統乃胥左衽每讀

元史恨未有秉春秋法黜之者  
不謂宋鄭所南心史先獲我心  
也吳門張子丘子持以相示述  
其事甚奇余受而讀之見其正  
統一論斤斤乎正名辨分於夷

夏之防獨三致意作而言曰夫  
非先聖史法耶序跋傳記以及  
詩賦拳、反正戀、故君熱血  
時拋忠肝欲碎靡不足泣鬼神  
而動天地所著終於至元二十

年每篇仍冠德祐之號主無少  
康而戴夏不改支微昭烈而思  
漢彌堅草檄立盟盡黜胡元之  
統似符若讖誓開大明之天精  
誠大類愚公銳志真能格

帝果祚我

明啓運直接宋之正統焉綜而論  
之春秋為衰周之心史故筆削  
定而萬年之倫紀不淆心史為  
故宋之春秋故予奪嚴而九世

之仇讐終復洵足為生民立心  
寧第自完忠孝爾爾耶居恒弔文  
信國精忠大烈千古無兩而前  
史所載間有縶緩不脫弱宋氣  
私殊評之今觀此書始知忌之


者之點染之也使當時執簡以  
往事遂著明九死無憾然恐觸  
忌而此史與此身同盡無益徒  
絕傳信耳故寧善藏其用俟之  
後世三百五十餘年不濡不滅

信國諸英魂實呵護之珥筆君  
子宜急取以補前史孤忠實錄  
良在茲也嘻彼誤國事虜以取  
富貴者塵消燼熄遺穢莫湔而  
董狐筆方出井扈憐炳人世公

之討賊不伸一時伸千載矣攬  
郡乘公閩產而披裘吳地意此  
中必有忠義之侶相與悲歌慷  
慨澤畔行吟者而湮滅不載惜  
夫今海內文章節義莫首吳門

此史一出竟若歷斗捫星者之  
表章恐後記云藏之名山傳之  
其人余獨竒九淵能藏而又嘉  
諸君子皆其人也授梓而弁以  
序時崇禎歲舍己卯長至古婺

張國維題



宋鄭所南先生心史目錄

咸淳集一卷

大義集一卷

中興集二卷

久久書一卷

雜文一卷

大義畧序一卷

後序五篇

正覺摩醯首羅天王療一切病咒





附刻卓行傳

見姑蘇志

總目

終

宋鄭所南先生自敘

文者三綱五常之所寄也合是匪人也又奚文之爲哉  
幼嘗問作文作詩之法於我先君子曰古未嘗有所謂文也  
惟古聖賢心正身脩德備行粹凡見於興居踐履揖遜問荅之間  
無非至文之文安事章句乎其或紀行事之實其或發天理之秘  
不得已而托於言語爰詔天下後世爲聖賢歸本無作文心此三代  
以上之事自漢以來專竟詞章言浮於理才騁乎學始文而爲文矣  
至論古今忠臣孝子仁人義士頗

有不達文者其躬行之事乃六經言也亦偉哉或讀  
書作文之士反不若之何耶是故行者本也文者末  
也有行而無文不失爲君子有文而無行終歸于小  
入行者匪他三綱五常是也悲今之人委身汗下誰  
辭欺世將焉取材汝欲爲文必本之六經立身三綱  
五常之大然後熟讀左傳孟子莊騷賈董韓柳歐蘇  
之書縱觀諸子諸史百家之說養其氣質老其才智  
秉正大之論揭大經大法弘播天下一舉斯民同歸  
三綱五常之天始無媿於爲文若夫體製意欲新語

欲簡古森嚴有法度主於理勿流於鑿庶不墮於綺  
靡卑弱及乎出奇直與天地萬物相爲變化於無涯  
庸以波瀾其才苟不身之以道惟務言語爲工是委  
文爲技耳良可歎息詩之法祖於三百篇下逮曹子  
建陶淵明輩詩之律宗於盛唐主以杜兼之李次以  
孟浩然高適王維輩要在漱書史之潤益其靈根歲  
月至才華吐爲天芬其體製欲溫柔敦厚雅潔瀏亮  
意新語健興趣高遠追淳古之風歸於性情之正毋  
爲時之所奪焉凡人之一言一動皆此心之形見者

也果能先立其大者何往不可豈止文之與詩也耶  
蓋心之爲心廣大于天地光明于日月不可以小狹  
之不可以物犯之惟始終養之以正則庶幾乎夫如  
是無言則已有言則必可觀汝其行之思肖後質諸  
數千百載聖賢之書又以此衡鑑古今人事之變乃  
知我先君子教我者至哉言乎且汗漫湖海從天  
下士游固嘗見盡法度議論精微者然根本之論或  
遺之故終身所法惟學我父而已敬述所受以爲  
自序云時

大宋德祐五年歲在己卯正月十七日三山菊山後  
人所南鄭思肖億翁自序

咸淳集

三山菊山後人所南鄭思肖億翁

題多景樓

時叛將劉整圍襄陽

英雄登眺處一劍獨來遊  
男子抱奇氣中原入遠謀  
江分淮浙土天濶楚吳秋  
試望斜陽外誰寬西顧  
憂

逢陳宜之

伯義

行李苦役役相逢古潤州  
千金一夜醉四海十年遊  
山靜鬼行月宵涼人夢秋  
近聞邊事急畎得無憂

送友人歸

年高雪滿簪  
喚渡浙江濤  
花落一杯酒  
月明千里心  
鳳凰身  
宇宙麋鹿性  
山林別後空  
回首冥冥煙樹深  
越州飛翼樓

飛來絕頂上  
流盼入無垠  
國土東南濶  
山川今古新  
高樓臨白日  
平地載青春  
直欲蓬萊去  
因風問大鈞

書懷寄孟耐翁

正傳

弓冶學不就  
悠悠信所之  
坐看浮世夢  
吟白少年髭  
樹冷巢營鵲  
山晴角解麋  
覩茲歲又晚  
而我獨何爲

山中聞鶴

涼夜坐巖石  
飛來白鶴鳴  
星流銀彈過  
月碾玉輪行  
萬里思不極  
一天秋更清  
欣然有所得  
長嘯度蓬瀛

遊觀音山懷鄉僧貴月溪

天地一閒人  
孤雲自在身  
去來心不礙  
語默意俱深  
山疊千層樹  
花連四望春  
舊年同笑語  
今日獨登臨

重題多景樓

時逆賊劉整圍襄陽已六年

無力可爲用  
登樓欲斷魂  
望西憂逆賊  
指北說中原  
糧運供淮餉  
軍行戍漢屯  
何年遂所志  
一統正乾坤

送人之官

爛醉擁貂裘揮鞭跨紫騮客途寒色重邊地月華愁  
旌旆開前道江山指別州相逢俄作別滄海一虛舟  
僧房夜坐

說到死生處令人羨出家法身終不壞濁世自無涯  
焚夾金銷字經簾綵散花擁爐待月上溶雪煑春芽

聽琴

洋洋盈耳間一派水潺潺意不隨聲盡心應與物閑  
宿雲穿竇出飛鳥御風還却喜無人識支頤看遠山

寄友人

御街暫分手相憶兩相望生意隨春動新詩入夢香  
九天饒雨露一水貫蘇杭地控衣冠會聲名日日彰  
別故人

拍馬又登程餘酣尚未醒曙蟾消淡白烁漢覆空青  
江走游龍勢山蟠睡虎形飄零母感歎天地亦浮萍  
就泛省畱別

歌聲送晚酒忽忽頗快青霄志已通燈火幾年成舊  
業文章今日試新功九天宮闕春城曉萬國輪蹄輦

路風每念蒼生受辛苦願爲霖雨白雲中

夏駕湖晚步懷古

吳王夏月車駕避暑之地

豈獨吳王事可憐人生回首總凄然空嗟落日猶如  
夢不記東風幾換年寶駕跡消前古地菱歌聲斷晚  
涼船如今城郭都遷變茅屋荒頽草積煙

睡覺有懷寄王梅塢垓

向年治亂屢興懷此日清閑獨把杯千古英雄人不  
見一樓風雨夢初回空中變化觀龍見世上淒涼誤  
鳳來須入山林了生死莫將心迹付塵埃

送人之行在

歌斷陽關奏暮笳東風吹客向京華三更舟度淞江  
月一路春連上苑花地逼星辰黃道近山環宮殿紫  
雲斜茲遊歸計須宜早莫遣相思夢遶家

飄零

飄零書劍十年吳又見西風脫盡梧萬頃秋生杯後  
與數莖雪上鏡中鬚晴空闊浮雲盡破屋荒涼俗  
夢無惟有固窮心不改左經右史足清娛

懷歸

突兀高樓落照間  
此身迥出俯人寰  
客心不逐年華老  
詩興何曾月夜閑  
峽水流歸天際海  
淮雲飛度浙中山  
杜鵑啼後歸舟發  
只有春愁滿載還

南山老松

凌空獨立挺精神  
節操森森骨不塵  
半夜波濤驚鶴夢  
幾番風雨護龍身  
貞寧受歲寒變氣  
老常涵古意新  
終見取爲梁棟去  
紫烟空鎖碧磷磷

卽事

河朔杯多席莫逃  
碧筩製酒飲兒曹  
雨餘地潤南風爽  
烁近宵涼北斗高  
月下夢歸吳苑路  
天涯心遠浙江臯  
靈均仙後無人怨  
誰肯明時賦續騷

訪隱者

石竇雲封隱者家  
一溪流水遶門斜  
滿山落葉無行路  
樹上寒猿剝蘼花

春日登城

城頭啼鳥隔花鳴  
城外遊人傍水行  
遙認孤帆何處去  
柳塘烟重不分明

春詞



心史  
上卷  
春氣暄妍御夾紗玉釵雙鬟綠雲斜倚欄看遍庭前  
樹盡是枝頭結子花

懷友

今日樽前忽憶君爲憐秋事又平分坐來凝睇西風  
久過盡天邊數片雲

春日遊承天寺

野梅香軟雨新晴來此閑聽笑語聲不管少年人老  
去春風歲歲闔閭城

贈老王道人

曾宴瑤池王母家瞳方鬢黑臉凝霞休將甲子來相  
問知見蟠桃幾度花

書蘭亭帖後

千載流芳禊事餘鼠鬚筆法重璠璵晉人多喜清虛  
話不及蘭亭一紙書

湖上漫賦二首

蘚厓蒼潤雨初乾石罅飛泉噴雪寒啼斷禽聲山更  
靜青松影下倚欄干

其二

一望湖光鏡面平暮鴉過盡斷霞輕  
狂來飛上高峰頂  
跌坐松柯叫月生

仙興

跣足蓬頭炯碧瞳  
劃然長嘯響天風  
千巖萬壑無人迹  
獨自飛行明月中

詠懷三首

讀書陋巷中愚直與時忤  
一鶴仰天鳴志不在塵土  
有懷諸葛公默然不發語  
後世無斯人清風激千古

其二

居屋雖不大終日心閑閑  
口誦聖人書立身仁義間  
俯仰無愧怍茲道誠爲難  
君子常進德小人儉自安

其三

驅車欲出門獨立眺虛曠  
恣意杯酒間舞劍心悲壯  
雖在寂寞濱心實千載上  
天地固寥廓亦當定所向

吳江垂虹雨後觀荷

睡龍瞪目開射光馮夷宮翻身弄變化  
噴水濕洪濛浪花捲寒雪斜噴清冷風  
雨歇龍歸來波心臥晴虹  
淨洗秋色出霽景涵青空  
爍爍錦炫晝新綠妬嬌紅

濕香吹不飛戀抱花心中醉面仰天笑月照三吳東  
虎丘

何年海湧來霹靂破地脉裂透千仞深嵌空削蒼壁  
山潤石乳甘秋冷鐵花碧闔閭雲空愁銀虎去無迹  
蛟龍鎮奇險拱護梵王宅

寄蕭梅初二首皆吾

韞匱玉未售妄想夜生夢風霜鬢鬢髻談笑氣傾洞  
上天宮闕高凡身血肉重顧影無其儔一呼四壁動  
抱茲忠義心慚與猿鶴共

其二

鴈聲杳然來壯心惕然躍委身坐枯靜飛語訊冥漠  
曾學屠龍技豈授龜手藥學成無所用舉世亦錯愕  
孰云方寸微天地入籠絡春澗花無邊雨驟雲不薄  
不齊臯夔肩當跨孤飛鶴

觀雪

吾獨愛觀雪心與雪同色清興匝空朗或語或時默  
李白有狂才飛筆寫無極驚倒天上人世間曉不得

古詩三首

筆田不豐年百巧皆畫餅宿火潛永耀奚慕脫囊穎  
汲古飲玄味至妙終身領虛懷抱空明爽語吐清冷  
不將白日身浪走紅塵影何當踏雲飛始信驍騮猛

其二

醉歌京華春行邁心搖搖孤雲未致雨隨風南北飄  
王國天地極幹運四海遙城中百萬戶飛簷插紫霄  
傾金買諛噓仰面氣宇驕不重讀書人研苦坐寂寥  
我欲封綠章天門高岌嶢豈抱浩然氣長年而漁樵

其三

蒼蒼碧玉盤烏兔東西越一氣母羣兒各弄性情妙  
雷動蟄龍飛天老哀猿弔俯首問洪濛萬古一長嘯

秋歌

涼風捲地吹秋來秋之爲氣何清哉紫簫露華浴萬  
宇暑神欲駐難裴回今年舍我去者二百二十有五  
日今日之後誰使來日來相催琥珀滿卮發越清奇  
萬物脆而易化五官靈而多知一世之間幾千萬人  
一人之心幾千萬變碎裂神氣紛云爲液槁矣而告  
憊氣翻然而相辭適之變化不知其誰氣母一丸空

虛蹠躍金浮木沉老怪消鑠我之變化亦不知誰蒼  
蒼茫茫萬萬古玄曠炯燦夜不瞽醉中喚秋與秋語  
秋辭淒脆咽不吐忽欲騎鯨汗漫遊海藏飛出白玉  
鼓

春詩

去年秋日作秋詩今年春日奈春何往春疊疊萬  
古來春冥冥春更多青皇旌旆開天衢三八二十四  
頭蒼龍車大開東方宮殿坐八荒之內交相賀紅紫  
茸茸爛如纈回首柳花撲晴雪造物弄人祗片時弄

歿世人人不知我心清泠湛無邊流光瀕洞先天先  
前身本在未鑄日月前黃面瞿曇長耳老聃乃吾無  
量劫後之孫後身復現搗碎虛空後當知所南先生  
爲無量劫前之祖人生精魄假合舞幻妄紛如氣丸  
越塵土偶然而來託爲形飄狀而去若無主今日之  
今霍霍詡詡少焉矚之已化爲古胡爲墮影黃泗浦  
獨坐翛然看春雨山蒼蒼水茫茫百歲劫劫太極長  
我來濯形白雲鄉大笑世上生顛狂醉筆作歌字不  
訛宛然蒼蛟老蜃勢相拏

琴女行

并引

有隣家女歲未笄黠兮容鄙舊習之汙耳慕古意  
於無窮鼓幽寂兮曠宇生風孤思貞潔兮月走碧  
落之方中於是時兮身若不肉泠然飛仙遺雜響  
於衆聽抱孤清而獨妍彼冰雪之潔兮奚顧芬菲  
分春而爭憐輒引而賦

嫦娥開殿當高青白光染夜生空明望中泠泠瑩如  
水碧透肉鏡雙瞳子窄袖籠春玉筍嬌援琴一鼓秋  
瀟瀟瑤池女子旨趣別紫清吹下太古雪雙鬟翠膩

縮香霧臨風欲控青鸞羽應悔思凡謫塵土長向花  
前憶王母

遇秋澗

靈襟吐洩山川秀擒勒造化歸雙手玄雲飛雨破青  
空聳動萬象鬼神走我管先人遊荊州曾同君醉  
江漢樓手捉明月入口吞足踏清風跨海遊于今二  
十二年後古吳國中相邂逅先人雖負一代名不  
似先生今白首

雪中醉題

心史  
上卷  
玄雪冥冥凝不飛朔雪灑灑晴還落水神恣意弄奇  
怪宇宙一白陰風惡南州客子心飄飄狂發長歌破  
寂寥醉中瀏亮金石聲精神秀發意氣驕故人睨目  
嗔我怪撫掌大笑群兒駭我家萬卷列中堂古人顛  
怪皆曾載須臾酒醒那得知索紙落筆蛟龍飛明曉  
火輪飛出海來看壁上新題詩

前雪歌

玄冥玄玄玄又玄一夜一尺平堦前故現幻化瞞俗  
眼忽變境界爲神仙彌望潔淨失汗穢與世坦蕩忘

歎偏混沌有影晝短短穹窿無縫雲懸懸慢飄如倦  
欲止歇斜灑似舞爭便嬛萬物根蒂不可見數筆圖  
畫安能傳詩戰素手白相敵酒潮赧臉紅不鮮老龜  
縮殼息飲氣臥龍哆口寒凝涎木帝捨暖施下土火  
精氣馭行中天須臾被野盡錦繡四望四野春無邊

後雪歌

不知今日是何年忽然生白照無邊全體瑩淨妙無  
象還我太極未分前開口大笑說不得一日一夜獨  
自顛與君同此光明域有辭難鑄玄中玄醉吐大語

吞六合前古朽言無光鮮浩然之氣開虛空舉頭渺  
渺皆青天

歲旦登萬佛閣觀雪

赤脚踏上萬佛頂全身坐斷清淨境見大光明徧法  
界不見三千大千影一時八面俱玲瓏諸塵諸相本  
無蹤色不是色空不空瑩然塞破虛空中怪見此番  
寒徹骨無中弄得光芒出蔦地省得大年朝卽是正  
月初一日

宋鄭所南先生自敘

予幼好吟長而尤苦於吟自景定以來至咸淳  
五年所作極多離亂之際併所著散文盡失之今記  
憶者惟詩五十篇目曰咸淳集姑存舊也厥後數  
載竟不作欲天其隱德祐乙亥冬有不可遏之興  
時輒作數語以道胸中不平事至於丁丑歲擇七十  
篇目曰大義集每一有作倍懷哀痛直若鋒刃之加  
於心苦語流出肺腑間言之固不忍然得慷慨長歌  
雖暫舒氣終則何如嗚呼痛哉堯舜之聖非吾君也



况於湯武乎又况於非湯武者乎

三宮在北

二王在南撫卷一慟天回日低天乎天乎其果無知

乎九州名山大川頗有磨崖石日泚筆以俟大書特

書焉願與我以時卒不悖於我

先君子之所教云時

大宋德祐五年歲在己卯正月廿一日景定詩人三

山所南鄭思肖億翁自序

大義集

德祐初年乙亥十二月初二日寓吳陷虜時我年三十五

景定詩人三山所南鄭思肖億翁

火德

火德續正統東南氣運昌維京都赤帝魯史筆天王

八極開清曉群星避太陽謳歌今有在曆數永無疆

德祐二年歲旦二首

時逆虜未犯行在

力不勝於膽逢人空淚垂一心中國夢萬古下泉詩

日近望猶見天高問豈知朝朝向南拜願覩漢旌旗

其二

有懷長不釋一語一酸辛此地暫胡馬終身只  
宋  
民讀書成底事報國是何人恥見干戈裏荒城梅又  
春

我生

我生逢叔世凡事倍辛勤漢鼎亂猶在胡笳愁不聞  
好花嫌朔雪回鴈避南雲無奈浩然氣臨風歌古文

春雪中作寄蕭梅初皆吾

春來頻下雪彌望漲癡陰無地可容足有天能見心  
峩冠甘虜笠正語化蠻音何日得隱去深山深更深

寫憤四首

天命尚屬漢大夫空美新三宮猶萬里一念只孤  
臣淚盡眼中血心狂夢裏身勿云今已矣舉首卽蒼  
旻

其二

未能歸趙璧我不厭干戈萬古青天在三年白骨  
多春風仍歲月世界自山河寧忍委國難飛身入

薜蘿

其三

心史 上卷 六  
北虜管深入東甌亦未曾江山能幾戰風雨廢諸陵  
雲盡喜天出宵殘願日升蒼蒼今悔禍識應 兩中  
興

其四

不信夜不曉哀哀鎖暗顰鐵城蹲敗土

時虜人悉平所得州郡城

郭錦國漲腥塵草泣荒宮雨花羞哨地春少焉開霽  
色四望一時新

贈僧

澹然無所著暫走世間塵羅漢來東土將軍現後身

語香清淨法心苦亂離春曾得拈花意縱橫變化新

獨釣

高興一絲在清風萬古長不爲周呂望願似漢嚴光  
天下皆秋雨山中自夕陽後來有孺子終久辨滄浪

書前後臣子盟檄後

死亦烏可已丹心闡大猷恭承 父母教用剪

國家讎日破四洲夜天開六幕秋終當見行事不與  
世同流

墨蘭

鍾得至清氣精神欲照人抱香懷古意戀國憶前身  
空色微開曉晴光淡弄春淒涼如怨望今日有遺民

曉晴  
雨晨輝朗霽一碧湛無垠草木新容淨林巒遠意分  
海生東出日天散北飛雲却喜風猶競微涼透夏薰

晚晴

落照開空霽明霞映水鮮乾文懸造化土脉潤山川  
白滿重圓月青還不翳天定鐘聲更徹通昔喜無眠

此心

此心期不變曾灑血爲盟舉世無人識終年獨自行  
海中擎日出天外喚風生淨盡去雲霧重開白晝明

卽事八首

舉頭雲蒼莽何以喻吾懷白眼世無偶青天路可階  
湘蘭終戀楚吳橘不踰淮龍臥未雷雨池塘空沸蛙

其二

棲遲破屋下書史自徜徉道不嫌清苦人皆笑獨狂  
晚花虧雨露老樹慣風霜莫望闔門北愁雲天外長

其三

一說乾坤事無愁鬢亦斑心飛空澗外身墮亂離間  
日落經何國歸雲識故山憑誰扣冥漠天道幾時還

其四

徉狂全性命守死混樵漁道否懷才老心高涉世踈  
掌中籌地理燈下論兵書愧我非諸葛何人顧草廬

其五

山川不可望荒草苦何深故國英雄淚終身 父母  
心清池函瑩玉落日墮圓金休問愁多少芳年雪上  
簪

其六

薰風吹不透熱惱苦無涯時異生淡恨雲飛動壯懷  
醉談天下事清坐月中階此意有誰解兒童自聽蛙

其七

大地盡戎馬皇皇奚所之此身猶夢裏無處問天涯  
鳥影驚飛彈蟬聲避過旗願言仍舊貫生歿太平時

其八

獨閉衡門坐無言意極長赤心懷 趙日綠鬢染吳  
霜火正當陽地風來自午方連宵驗天象心宿炳明

心史  
堂

心宿明堂  
古宋分野

宿半塘寺

一襟清氣足此夜豈人寰醉影松杉下吟身風露間  
秋懸當殿月雲宿近城山明發騎鯨去飄然不可攀  
對雨有懷

世道忽翻覆愁來痛徹心腥風行殺氣淫雨哭秋陰  
虜睨朝廷璽官空帑藏金 妃嬪今草地宮髻淚  
中簪

次韻

冥迷江樹外一鳥破雲還雨雪乾坤變干戈筆硯閑  
命于時不偶心與道相關終見二三月花邊展笑顏

自挽 德祐乙亥臘作

堂堂男子不封侯與命為仇死未休陷虜有歌春夢  
斷哭天無地夜魂愁九清風露極玄處萬古虛空自  
在遊痛恨莫能生報 國從今陰隲溥南州

一旦

一旦蒙塵朔漠行杜鵑哭破舊冤聲金杯暫飲胡瓶  
酒玉鉉誰調御鼎羹故國夜長天正晦離宮春盡草

初生小臣有誓曾銘骨不到神州不太平

偶成二首

劔氣熒熒夜屬天忍觀禾黍廢蒼煙夢中亦問  
朝廷事詩後唯書 德祐年花柳有愁春正苦江山  
無主月空圓如今好棄毛錐子望北長驅馬一鞭

其二

曾受家傳究典墳自期不與俗人群 君臣位亂綱  
常在 父母恩深生死分霽日行空鎔積雪長風吹  
曉淨殘雲坐令世上春光好長使桃花笑臉醺

答

語聲帶咽吐新詩徹骨啣冤痛不知報國心惟憂漢  
賊讀書人肯學胡兒劔携入手霜三尺鏡掛當胸月  
一規終久難磨天理在匪伊談笑定時危

鴈足

鴈足冥冥未報歸此心裂碎有誰知一懷憤悶心啣  
苦兩鬢鬢髮倒垂醉後愛歌諸葛表生來恥讀李  
陵詩喜吾筋力猶強健願爲 朝廷理亂絲

次韻三首

百歲光陰十過三故山路梗夢中還看來身在終爲  
累悟得心空始是閒幾度踏雲歸草屋有時臥雨掩  
松關人間轉盼皆陳迹何必長生久駐顏  
其二  
活計烟波羨謝三醉眠釣艇去仍還爲憐灰者今何  
在笑殺忙人不識閒燭影欲殘登夜榻鼓聲未絕啟  
晨關匆匆役役塵中走一見青山一動顏

其三

花前歡笑憶春三何故東君尚未還一寸心中千種

事百年世上幾時閒虜遷玉帛猶歸市馬犯金湯卽  
棄關生怕朔風吹下雪飛來點鬢妬紅顏

古時

古時明月碧霄間曾照鸞輿幸蜀還御座乍空

三殿遠朝儀暫歇六更閑馬屯腥霧彤墀壞鶯哭

冤春玉戶關若是年年歸舊燕遶簷偷語問龍顏

補夢中所作

夢作一絕覺而遺首兩句君王二字夢中作中原  
二字嫌其忘於本朝改而足之



鴻鴈流離夢亦驚滿懷淒怨足秋聲此身不死胡兒  
手留與 君王取太平

聞陷虜宮女所問

塵汙宮裝粉不香死生魂夢只昭陽一逢人自南來  
者垂淚殷勤問 二王

題陶淵明集後

拂袖歸來未是遲傳家何用五男兒不堪生在義熙  
後眼見朝廷被篡時

秋雨

雲滿長空雨滿山淒淒風色變新寒夜來白帝將秋  
去萬樹淋漓哭不乾

逢故人

曉路雲埋撥未開霜風空老棟梁材平生不識悲秋  
事今日白頭何處來

秋成

秋成田里自人煙刀斗聲中又一年王莽貨泉成底  
事東都仍用五銖錢

北望

紫塞風高直北秋黃河水自向東流穆王御馬還宮  
日海內封疆只屬周

南陽遙望見春陵殘雪初消霽日升鬱鬱葱葱有佳  
氣漢家天子必中興

匈奴

匈奴殘破漢封疆江北江南盡戰場若問生靈誰是

主如今天子又

康王

康王 本朝  
高宗皇帝

絕句十首

羊裘獨釣浙江湄百姓哀哀苦亂離但得漢家鴻業  
在莫愁光武奮身遲

其二

目斷秋江欲暮時天邊落葉弄愁飛 翠華幸北平  
安信只願新鴻帶得歸

其三

玉輦愁經草地腥酸風頻捲馬頭塵 我朝三百年  
忠厚不信山河屬別人

其四

八  
閨門城外水涵空  
鴈影淒涼落照中  
一望秋風數千里  
不知何處是行宮

其五

草木恩深雨露餘  
公卿環列漢庭居  
一朝投閣千年笑  
却是楊雄不讀書

其六

一葉飛秋萬樹寒  
行吟憔悴倚欄干  
淵明只憶晉朝事  
滿眼黃花淚不乾

其七

銀漢斜傾玉漏殘  
欂蟲熠熠照清寒  
最憐今夜下弦月  
一半娑婆樹不完

其八

駿笠氍靴搭護衣  
金牌駿馬走如飛  
十三門裏秋光冷  
誰夢朝天喝道歸

行在十三門搭護胡衣各金牌胡爵

其九

西風滿路奈愁何  
昏鼓聲中厭北歌  
菱藕市空燈火斷  
一城秋怨月明多

其十

子夜神遊碧落間羣仙飛語下人寰上天深念蒼生  
苦特勅三宮聖駕還

五忠詠

制置李公

芾

公之忠義最烈古未有之所聞未及其詳故未敢  
書今虜亦祠祀之矣  
舉家自殺盡忠臣面仰青天哭斷聲聽得北人歌裏  
唱潭州城是鐵州城

丞相李公

庭芝

公受刑後書吏夏徵冒險白於虜酋阿朮丐公之  
屍斂棺葬於揚州堡城司空廟後人皆危之徵亦  
義士也

大駕迢迢已北行淮南猶守九州城只謀渡海南歸  
國不意忘軀博得名

察使姜公

才

公至歿罵賊不絕口且劇口罵夏貴李公庭芝爲  
淮東制置姜公爲制置府都撥發官凡李公得堅  
守淮東歿爲忠臣者皆姜公之力也

殺氣盤空白晝陰始終不變似精金直疑碧落三更  
月來作將軍一片心

都統王公

安節

節使王堅之子在常州與賊戰所部三百軍皆陷  
公雙刀孤戰殺賊不計數賊嘗擲示十萬戶金牌  
與之不受口則罵手則殺以馬失利而歿虜賊咸  
稱其能歿戰也

健兒三百陷胡塵匹馬孤騰勇過人至歿執刀唯罵  
賊自言不作兩朝臣

隨駕內嬪某氏

隨駕北狩內嬪某氏虜酋屢欲犯之以其吐語貞  
烈竟不可得乃書於裙帶上曰誓不辱國誓不辱  
身遂自經於虜館歿後爲虜人分鬻其肉食之  
玉殿辭春陷馬塵忍將羶穢汗貞身能行男子難行  
事羞殺朝中投閣人

寄同庚友

淳祐初年同下生已經三十七番春此身雖墮胡塵  
裏只是三朝天子臣

旅瑣曾聽月下猿至今觸事卽愁端北風昨夜無情甚又作冬來一信寒

小春花

天地無情正北風飛鴻哀咽亂雲中此時縱使開千樹不及東皇一點紅

對菊四首

天風吹古秋獨立殿寒馥我父昔愛之終身不忘

菊

其二

受命太極前立身晚秋後一朝揚清香名動天下口

其三

日月雖云逝山中秋自香平生抱正色誰怕夜來霜

其四

三逕今非管多愁老此身誰知陶靖節只是晉朝人

陷虜歌

德祐乙亥十二月廿八日作又名斷頭歌

德祐初年臘月二逆臣叛我蘇城地城外蕩蕩爲丘墟積骸飄血彌田里城中生靈氣如蟄與賊爲徒甘

六日蚩蚩橫目無所知低面賣笑如相識彼儒衣冠  
誰家子靡然相從亦如此不知平日讀何書失節抱  
虎反矜喜有粟可食不下咽有頭可斷容我言不忍  
我家與國同休三百十六年閱歷凡幾世 忠孝已  
相傳足 大宋地首 大宋天身 大宋衣口 大  
宋田今棄我三十五歲 父母玉成之身一旦爲氓  
受虜屢我憶 我父教我者日夜滴血哭成顛我有  
老母病老病相依爲命生餘生欲死不得爲孝子欲  
生不得爲忠臣痛哉擗胸叫 大宋青青在上寧無

聞自古帝王行仁政唯有 我朝天子聖老天高眼  
不昏花盍拯下土蒼生命忍令此賊恣殺氣顛倒上  
下亂綱紀厥今帝怒行天刑一怒天下淨如洗要荒  
仍歸禹疆土四海草木霑新雨應容隱者入深密歲  
收芋粟供 母食對人有口不肯開面仰虛空雙眼  
白

狂歌

一笑識破天地根隨意變化易其名俯御三十六天  
頂主宰一氣生羣生倏歛有怒行號令億兆雷鼓轟

心史  
天聲勅喚龍口數滴水淨洗世界冷然清推出火帝  
照寰宇萬萬萬世長光明

宋鄭所南先生自序

夫詩也者心之動也其動維何因所悅所感所憂所  
苦觸之爾一動之天多事之源也苟知動而無動則  
不爲動之所動矣今八荒翻沸山枯海竭身於是時  
能無動乎夫人之生性於天之清明形於地之重厚  
我主乎其中天地萬物莫不俯首爲賓是我之所得  
者甚大也奚自小之乃不君其君外走逆亂之區盲  
其主反臣於賊求活焉惡俗滔滔爲江爲河不可禁  
止傷如之何我雖無知寔不敢與賊走而俱化故哀



痛激烈剖露肝膽灑血誓日期毋渝此盟五六年來  
夢中大哭號叫 大宋蓋不知其幾此心之不得已  
于動也夫非歌詩無以雪其憤所以皆厄挫悲戀之  
辭我之所謂詩者非空寄於言也實終身不易之天  
也豈徒詩而已哉澤畔孤吟塊然其形心乎一脉之  
生眇然千米萬雪之下微微綿綿不絕若縷窮陰戮  
力殺之終不可得而殺此一脉之生將大而爲天地  
萬物生生無窮之生也歟以天道人事驗之 中興  
迫矣故曰中興集時

大宋德祐六年歲在庚辰四月十五日景定詩人三  
山所南鄭思肖億翁自序

中興集卷之一

巳卯夏後至庚辰八月所作

景定詩人三山所南鄭思肖億翁

黃河清

并序

近有南人自北歸紀之於籍云某日渡河土人謂  
丁丑歲四月黃河清戊寅歲十一月又清數旬古  
語曰黃河清聖人生吾大宋人也知大宋而  
已然則中興有日矣獨惜夫人之生於唐末年者  
歷五代八姓五十五年至國初僅七八十歲首  
尾生死於唐宋之間為七代之民何重不幸耶

爲馮道者比比皆是。我宋豐水有芑之仁陶化  
斯世三百年彼忍哉彼忍哉今黃河清矣汝輩何  
所逃乎吾謠之曰黃河清夫大宋中興天下太平  
故作黃河清詩曰生乎大宋人出於大宋而  
丁丑戊寅歲黃河兩度清但教大宋在卽是聖人  
生亘古理不泯中天日轉明這番戡定後世世未休

兵

自題大義集後

長夜漫漫發浩歌生民塗炭果如何  
中興車馬修

攘在變雅君臣廢缺多赤幟開明新日月青氈恢拓  
舊山河誓崇忠義誅姦逆田海雖遷志不磨

郊行卽事四首

一變太平業民生若失巢乏牛耕瘠土多馬壞荒郊  
花園半栽菜穀田今長茅幡然欲深隱遠與世相拋

其二

五年前事別一說淚滂沱  
帝業雖遷鼎人心未倒  
戈日光疑白晝天影愧清波背立官塘路風前慷慨  
歌

其三

癡立若忘歸欲言還又訥時危恐懼多國破繁華歇  
黃葉辱吳山綠蕪欺魏闕兩峰流水聲偷哭漢宮月  
吳山在行在大內鳳凰山側

其四

雲禁江城晝色陰可憐寂寞讀書身風霜虐命四五  
載雨露潤民三百春鴈落愁聲唯送淚馬馳怨迹豈  
成塵如今不獨桐江上新着羊裘又一人

觀顏魯公帖

吾拜魯公帖凜然氣如生終身大唐臣千載名崢嶸  
愧彼今之人獸心蠹天經

苦懷六首

我行荒野間風埃苦浩浩嗟汝後生者惟恐不見老  
世事如霜木顏色盡枯槁愁來不卽死反爲命所惱  
今人真小兒語話尚癡倒不辨親與讎得食卽爲好  
焉知父母心如痛傷懷抱難報三春暉滿地皆芳草

其二

滔滔流波瀾百川俱頽靡競羨呂望貴獨欠伯夷死

小恩尚思報大義反忘恥國家三百年果何負於爾

其三

南山一何高支脉遠不斷巉巖峰巒間松柏蒼翠滿  
面陽地力盛萬物發新暖我欲飛至之惜哉羽翮短  
昔爲天上雲今作地下塵跣足屢哭懊痛惜六尺身  
父母生我時教我爲賢人生得男兒骨一死亦精神  
疇謂迫中年墮影濁水濱跼蹐走殘命語颯氣不伸

其四

固知復繼剥霜雪天地仁願得一脉暖散爲天下春  
援手水火間以道拯斯民俾知尊卑位萬世不湮淪

其五

我命而爲人形異禽獸生所以異者何不越網常行  
斯道如日光千古同一明胡爲舍白晝摘堊塗冥盲  
伯夷聖人遠雙瞳空晶晶悲風吹語斷天濶青山橫

其六

古人立志高爲義不爲己今人所見卑獨爲貧賤恥  
不義富貴生寧以餓而歿遺體非不重所懼悖於理

我稟清淑氣生而秀爲士讀書三十年頗知六經旨  
質之以人道所言皆如此奚乃滯風塵爾汝弄歡喜  
浙山高蒼蒼浙水清瀾瀾三歎動遐思清風響兩耳  
暫焉深隱去長鑱訪園綺敬俟時之清終其天倫爾  
已卯十一月朔又夢食梅花夢中作  
鴈宇高高兔國斜濕花飛露沁流霞狂來清興不可  
遏弊盡寒梅一樹花

遣興二首

獨笑或獨哭從人喚作顛生惟嗜食菜貧亦恥言錢

清興遊空外孤愁抱日邊所憂無別念鴈又犯南天  
其二

傳家曾受易所得亦良深今古豈二道歿生惟一心  
顛風掀曠野癡雪厄寒林不改隱居操扃門自鼓琴  
送僧游西湖歸永嘉

大地瘡痍痛正新南歸不避雪紛紛柳邊人憶一湖  
錦松下僧閑九里雲熟路有緣家易到空經無字世  
難聞菖蒲澗水濯雙足鴈蕩山巔曝夕曛

結交二首

鳳鶡同爲禽麟虎同爲獸以彼善惡殊致令分去取  
惡者僞以善惑世不可究唯在行事間以理觀於久  
或不近人情避之如避臭君子重結交芳名垂宇宙  
其二

伐木義不古僞敬溢顏面交接無真情面是背乃變  
疎則易爲恩密則將成怨當學晏平仲終始保相見

隱居謠

布衣暖菜羹香詩書滋味長

醉鄉十二首

并序

醉鄉箴附

余偶得醉鄉題忽興動累十二章不其泛乎素不  
能以酒醉於醉鄉乃以詩醉於醉語是亦真醉於  
醉鄉矣或曰君兩年來不作詩今何爲而作耶曰  
予今不求人詩亦不與人詩人與詩亦不受人求  
詩亦不與不倡以先之不和以從之執是數者已  
確或意惰累年不作或興動一日數作皆天吾天  
而已或鄙之亦不辭

破得愁城了仍還太古風渾然無事國不與世相通  
地邁華胥外天歸混沌中蠢哉蠻觸氏苦歿角英雄

其二

狂藥斲凡骨疑來別一州形骸閑若棄風壤曠無憂

屢有聖人至徐邈曰酒之清者曰聖人難同惡客遊元結曰不飲者為惡客

所交惟陸諝唐子西有落魄老菟裘

其三

盎然非世境樂意渺無垠暖骨通仙處寒冬能幻春

眼空天亦小心淨月逾新昔者李太白於茲竟瘞身

其四

太和國土裏風味極清柔意外竟忘世胸中不夢秋

日蒸春氣湧地漾水光流此即神仙窟何須更十洲

其五

獨到至樂處于于自在行身心全去礙骨肉若通明

劫外冥天地空中一死生却觀凡世界眇爾幻漚輕

其六

誰居此域作生涯偏許劉伶畢卓家屋影空空天渺

澹燭光閃閃地橫斜春紅軟玉頰衣樹秋碧流波漾

纈花接壤或通三島路任他苦海事如麻

其七

...



萬里和風眼底回陶陶樂土隔飛埃暖浮花思春初  
透紅漲霞紋潮正來長駐童顏驅老去不教玄髮受  
愁催舉頭闐闐手能摸更欲乘風過九垓

其八

風物清妍地不塵一天無盡四時春此中正屬忘懷  
境來者多應避世人

其九

紅潮初上玉船空假道青州一水通相去塵寰千萬  
里不愁日夜不春風

其十

大哉春宇溫厚凝聚靡有沍寒暖於吹煦厥俗孔洽  
恬無憎妬高陽之徒歷年熟路惟楚屈平欲來莫赴  
我至是邦妙莫能喻至和滋形神與天遇載朗笑詠  
金玉韶護至清之氣噓呵風露喜若悟道默契玄趣  
陋彼市朝喧隘弗寤願我遐年克壽厥寓

其十一

天道何冥冥委形闢空杳曠劫土坦平冲氣藹雲杪  
不入禹封疆拓地八荒表空洞無邊涯一切境界小

骨柔春香濃目紺夜光瞭洪荒上古前命不爲愁勦  
卑哉蒼生愚役心顏貌愀窻猴狂搖搖野馬走擾擾  
髓竭冲融膏渴命竟枯天奚不來此邦軟坐廓幽眇  
剗刷膏盲俗滌濯肺腑皎騁駕無可遊一生事足了

其十二 醉鄉行

窮冬驕寒凍地裂北望朔方常下雪五臺積古雪不  
消鳥獸毛氄結凍血江南昔有酒如澠蔗漿麟脯相  
憑陵 朝廷有道四海清旣醉鳧鷖歌太平九土夜  
市徹天明樓紅陌紫喧簫笙豪氣一飲一千鍾喚得

國裏春風生千金少年百花眼左右捧擁上天行戰  
鼓聲多瓦欲飛從此百姓無寧時龍遭鱗舞鼠變虎  
恣意反覆弄風雨如今寂寞不救飽髑髏眼睛生秋  
草空欲拍弄百斛船莫羨釀來曝背眠何如我入壺  
中遊喝雲開破天外天翠錦幃幕車渠土八面雪白  
淨無烟水王雙闕瓊膏填使得五行顛倒顛坎離構  
春中央宮俯現摩醯王王仙手執乾坤萬化柄斟酌  
混沌殼中髓嚙得半掬碧色雲夙根無明百雜碎萬  
緣俱空恬無爲四肢馥郁紅玻璃自然氤氳太和身

融融洩洩先天春形化為氣輕於霧飛御慈盼福下  
 土金相朶朶鮮綠雲花斃絲衢跨空住八十一天開  
 玉殿天天互透長生路憨湧醴泉雨甘露孕牛產麟  
 鰥蛟舞九苞鳳凰對舞鳴鈞天清憂雲璈音初取龍  
 猛大士藥西土龍猛大士有藥能點大山盡點大地  
為金相傳今尚有龍猛金焉

變黃金嫦娥搦弄團圓雪拋向下界懸作月銀光倒  
 潑白冷明笑吻霏霧飄香冰戲擲火丸煎海乾珊瑚  
 萬樹紅斑斑抱出懶雨活龍帝拔髯痒鼻激噴嚏鼻  
 氣環空掛白虹垂脚東貫大荒東八八翠衫蓬萊兒

舞撒寶花雙逶迤千丈白耆老神翁前導萬從開天  
 倪徑出盤古頂外行刮風浩浩空掀轟呵暖為春吸  
 為冬濁世甲子剎那中數數老松化石了錢鏗小廝  
 半刻天我之大醉八萬四千歲小醉三千六百日世  
 上幾回漢與唐苦於爭戰悲猶狘萬國黔首行飯囊  
 鬼貌藍色心茫荒狹步蹙躡羶埃裏蜉蝣拜天祈壽  
 長氣濁馨欬不清響啾啾碎聲羣爭攘生來不識快  
 活國紛華外勝奪心王晝夜火燒菩提樹背井索水  
 啣且僵哨地荒年苦命活籛條戚施瘡痍傷貧者逼

迫富者狂一窪血氣六賊戕眼望天上金銀落壘瓊  
架屋鐵築墻莫知仁義爲何物冷笑詩書今不香沉  
酗私欲反爲醒嫌說青山白雲人羣昏駢駢搖不覺  
強語以道必生嗔忽笑大笑休休休回視若輩愁如  
讐揮手長揖永相謝千劫萬劫逍遙遊

醉鄉箴 并序

君子之至是邦庸以養恬小人之至是邦適以滋  
亂此鄉坦夷厥土惟清壤九州之地弗及之故其  
人物皆有士君子之行焉彼之游泳道涯入於無

量之域雖忘形骸禮而不亂身其景福樂之於內  
居之久而安或失其道瀆常經鼓洩其孽氣見之  
於外卒莫寧處非醉鄉本俗也雖然亦足以別君  
子小人歟後之入國問禁者其審於是箴曰  
維人之生所主者德瞿瞿良士藹然溫克其天其游  
養和於默勿爲氣奪遷其常則爾敬爾身天命難必  
罔越乃行終其永吉

德祐六年歲旦歌 庚辰歲

天運無情歲事新 大寶虛位孤王春晝出銜恤夜

夢哭皇皇五載臣無君南望二王未駐蹕北憶  
三宮猶蒙塵祆祲蝕日地軸折冤氣上騰霾蒼旻百  
姓茹苦痛徹髓大事未定焦如焚我寧久處遯悶中  
遽忍終死爲逆民大哉父母之遺體與生俱生仁義  
身天鍊精金鑄我心上籀忠孝兩字文痛憶我君  
我父母眼中不識天下人不變不變不不變萬挫以  
死無二心醉喝海嶽尚翻動不信不滅犬羊羣或謂  
逝水不可復叱我癡忠空愁顰焉知漢絕十八載光  
武乃興春陵兵卽此一語斷世事仰面再拜淚如傾

西漢絕於平帝元始五年乙丑歲至王莽五年壬午  
歲光武於春陵起兵乙丑至壬午恰十八年至乙酉  
年光武始立國改建武乙丑至乙酉相去二十一年  
東漢始興詳見漢史今日德祐六年歲旦歌乃  
祥興二年歲旦歌也太歲則庚辰也南國正統在  
天一涯亦未嘗間斷焉我陷虜雖六年其實則德  
祐之民故曰德祐六年歲旦歌心愁欲絕目掛空  
碧滿腹不平氣何時遂於一吐卽杯酒光風霽月之  
下相與歌吾德祐六年歲旦歌吾之願足矣或疑  
不不變三字蓋痛切語殺之辭非謂不能於不變也

苦雨

霖霖厄晴光曾臆堆倥傯魍魎嘯陰風砭中肌骨痛  
物象各憂囚坤輿一瀕洞死禁朝陽升私竊陰權弄  
我剖一寸心灑血聲大慟叫天開光明晝夜永不霧

勵志二首

炎正遭中微冠屨紛倒置四壁皆楚歌  
獯鬻何凶熾萬命墮荆棘身與豺狼  
值攢眼刺荼毒地無隙可避君子  
餓欲死爲時所唾詈白晝行夢中  
更相問憔悴我蟄茅茨下有生痛  
自愧寒燈弔老影惻惻不遑寐憂  
抑併填膺反覆論此事嗣君尚幼  
冲厲階誰所致權奸弄破國珠玉  
亂走地曾謂頃刻間一蹶失神器  
風沙犯天顏生歿一葉寄勢去若  
瓦解哀告不可譬太廟櫪胡馬太  
學巢胡吏殿閣奏秋涼羣羣走魑

魅淒風吹宮花春不肯明媚哀笛  
破溪愁滿目新亭淚我朝聖明君  
一一皆善治涵育三百年豈無忠  
義士我讀我父書頗曾識大義無  
以歿恐我歿亦心不二殘生齧膽  
槩氣怒頻裂背或時坐如歿突眼  
噤相視先王澤未泯中興斷可冀  
仰呼籲不平挺身攄大志四方皆  
風動德化成漸被春秋生殺權華  
夷有定位後有董狐筆當嚴於載  
記爰以明人倫永使勿顛墜

其二

大哉天地經森然不可踰 聖人治天下綱嘗安厥  
 居誰謂遭大變干戈血模糊天地忽破碎虎狼穴吾  
 廬毒氣孽萬物草木俱焦枯我為 國之臣於義當  
 捐軀受死不為痛 國家終何如念此迫我心萬劔  
 裂肌膚骨腐尚啣冤且為 國家圖鬼神果有知聞  
 之亦歛歔

春日偶成五絕

山塘遊舫接荒城縱有笙歌耳不清  
 溪憶 國家無事日人心和氣是春聲

其二

曉來怕上最高樓春盡時光只似秋  
 草木荒寒生意澁風腥雨膩一天愁

其三

郡縣荒蕪哭暮笳憑高望不見天涯  
 如今揮淚灑枯木南國春回生紫華

其四

天地腥羶社稷隳萬邦赤子病流離  
 幾番曾共秋風語說得虛空亦淚垂

百萬胡兒犯大朝  
奔南狩北恨迢迢  
我非辦得中興事  
一點英靈歿不消

木蘭寫憤三首

偶一夕枕上苦吟  
不就忽於夢中吟  
得五字云翻海洗  
青天正屬對間爲  
人喚覺則天已大  
明矣今足之于後

自許志頗大頻歌  
慷慨辭攢眉無說  
處仰面獨行時豪  
傑心猶槩生靈命  
若絲當今欲平治  
舍我則云誰

其二

開眼看不得愁來  
只白顛六年萬憂  
苦四海一腥羶歎  
命巧相值觀時痛  
可憐却慙深夜月  
猶忍照胡天

其三

朝廷罹禍亂民物  
苦顛連晉帝渡江  
識唐皇幸蜀年剖  
雲行白日翻海洗  
青天辦得大事了  
胸中卽泰然

偶成

郡國殘民少君王  
何日歸不知秋後  
鴈猶得向南飛



無題五首

屢問北來者相傳盡不同  
三宮在何許萬姓墮愁  
中春草活腥綠雨花啼慘紅  
人間至微物今亦怨天  
公

其二

自古無茲難 我朝今遇之  
小臣慙逆土大事決成  
期刦壞六龍歿天荒萬象悲  
時哉弗可失奮發莫遲  
疑

其三

一天悽愴事此恨極難裁  
骨縱已成土心終不肯灰  
毒蛇噓樹歿怨鳥哭春哀  
處處山東老懸情漢詔來

其四

愁海茫茫望不窮黃芽白葦渺陰風  
鳳凰高遁層霄外豺虎橫行大道中  
九廟傾頽郊祀廢四方禍亂  
國家空于今建武重興漢誰是雲臺第一功

其五

鞠躬盡瘁弔無君滿耳冤聲不忍聞  
醉去忘形猶蛻骨怒來嚼齒欲穿齦  
腥風沈曉春應怨瘴霧霾空路

莫分熒惑星明聖人出頻頻中夜驗天文

和文丞相六歌

不次韻

我憶三宮幸朔方天顏皺黑鬢髮黃鬼風尖尖割  
肌肉驚沙撲損龍衣裳群黎命歿北魔手世界缺陷  
苦斷腸小臣翅短飛未得望破癡眼愁更長嗚呼一  
歌兮哀以傷白日無光天荒荒

其二

我憶二王血淚垂一絲正統懸顛危士卒零落若  
霜葉陣前將軍今有誰以舟爲國大洋裏萬歿一生

終安歸至痛無聲叫不響皇天皇天知不知嗚呼再  
歌兮歌孔悲風雨驟至晝冥迷

其三

我憶我父在日時叱我癡鈍無天姿旦旦灌溉仁  
義澤靈臺豁然開光輝夙刼孤露命濁世王事鞅掌  
生無期一憶父母教我語逃罪無地歿亦遲嗚  
呼三歌兮淚淋漓君父不在倚賴誰

其四

我憶母氏兮聖善勞苦家事手生繭母後父歿

十五年教我育我恩不淺我雖貧拙志不屈清氣稜  
稜秋瑩骨至今一粟一縷絲皆是 父 母流傳物  
嗚呼四歌兮痛惻惻皇天后土無終極

其五

我所思兮 文丞相英風凜凜照穹壤失身匍匐草  
莽間屢迫以死彌忠壯虛空可變心不變吐語鏗然  
金石響想公骨朽化爲土生樹開花亦南向嗚呼五  
歌兮併悽愴望公不見愁泱泱

其六

我生我生何不辰血淚化作妖花春平生意氣若風  
雲何苦戚戚悲呻吟狂來一呼天地動萬物鼓盪俱  
精神天上真火滅不得灼爍大地生光明嗚呼六歌  
兮歌聲清海嶽瑩潔日月新

久雨後郊外獨行

新秧遭水毀歲事正關情日沒虎狼出城荒荆棘生  
清流不可污古道竟誰行闊步獨歸去茅簷月自明

追獎

并序

毛惜惜高郵軍妓也 理宗朝榮全據高郵城叛

召惜惜佐酒惜惜怒叱之曰汝本趙官家健兒  
何敢反耶吾有死耳不能爲反賊行酒榮全以刃  
裂其口立命斃之罵至死不絕聲嗟夫今之男子  
挺挺讀書學爲君子者反蕩然掃地矣不知此婦  
人旣失身汗賤果何所學何所見而臻於是吾豪  
傑士也崢嶸之氣不爲世變消鑠此國家仁義  
涵養之所致其敢負國家乎聞此風者頑夫廉  
懦夫有立志不待文王而興可也扼腕時艱追憶  
惜惜之事今實不易得故賦以美之

誰謂匪人賤猶懷事賊羞挺身持大義正語叱狂酋  
名在春逾艷骨香花不愁有靈知國事地下笑王  
侯

詠懷二首

鳳爲百鳥王孤飛無其友覽德而來儀千載不一有  
云胡德之衰囚身狎雞狗我當愁來時散髮狂叫走  
歷歷訴此苦太空亦肯首

其二

精衛雖至微啣石尚填海一點至烈心千生萬生在

我誓銘于天語大莫能載萬萬雷霆誅此盟亦不壞  
劃然笑一聲今古生光彩

精熟三首

中興集卷第二

景定詩人三山所南鄭思肖億翁

我苦心吟事二十年矣 德祐前詩僅存一二記序  
等作則盡亡之亂後所作幸猶存焉今陷身不義蓋  
傷于心期剪滅此而後朝食凡所有作意在大事不  
敢索籥風雲月露之妙鑄爲獨樂之辭然亦不知其  
果爲詩果不爲詩也自 中興集黃河清以下隨得  
隨入更不刪去主於述懷不以辭語爲選擇今所作  
無題者俱以礪之一字次第目之礪者言淬礪乃志

心史 上卷  
決其所行也漢頌逆莽功德者四十八萬餘人今又  
過之唐顏氏之門死於賊之刀鋸者三十餘人今無  
以尚之何從逆者衆盡節者寡歟晉卞壺父死於君  
子死於父偉哉我銘 父 母之教于靈臺與生俱  
生與死俱死而不忘者也天高地下日照月臨有違  
家訓雷其殛之

一礪

庚辰九月

愈久愈不變一忱生死俱獨行天與語枯坐石爲徒  
血汗衣冠國寃浮盜賊區何當洗兵馬終古統炎圖

憶前輩二首

昔在

先皇帝

理宗

當陽四十年文明照天下俊傑

立王前一自胡兵入俄驚漢鼎遷致今人道亂空谷  
遁遺賢

其二

治世衣冠盛人才極典刑開心呈日月吐語走風霆  
氣象近三代文章出六經今焉不可得四顧一冥冥

續洗兵馬

遭時不祥厄陽九垢面蓬鬢喪家狗四夷交侵小雅

心史 上卷  
廢率其子弟攻父母封豕長蛇亘人域 天子下殿  
跣足走凝碧池頭樂最愁連昌宮裏花亦醜三精霧  
塞黑瞳瞳天破地裂一無有誰執弓矢救日月仰泣  
旻天大號吼賢者不入勝毋里義士恥飲盜泉水丈  
夫立身乃大事一失此足死亦恥當知孔明杲卿輩  
巋然三代古君子呂尚磻溪釣文王乃是漢唐人才  
爾到今大壞不可救鴟梟破鏡咀唇齒高瞻雙眼視  
天下黔首渾敦狀如鬼龍堆大漠鳥獸夷舌捲音響  
蠻侏離不類人形舞百怪錯亂天命災羣黎營州羯

狗祿山

也 猪龍形詎能篡有唐丕基太子卽位靈武日

天開萬仞磨崖碑載定尊卑奠鰲極一新正朔授人  
時漸被日出月沒處梯航臣妾拜 京師黃旗紫蓋  
東南興大火王氣浮晴春勿欺一成一旅微少康猶  
能作之君班超已著王命論陳嬰王陵母生心絳衣  
大冠大敵勇今日豈無劉將軍田野豪傑久延頸一  
呼而動雲來奔我當率之效馳驅整頓乾坤明大倫  
舊邦新命光前王逆俗汙染咸惟新

心史  
卷一  
愁裏高歌梁父吟猶如金玉憂商音十年勾踐亡吳  
計七日包胥哭楚心秋送新鴻哀破國晝行饑虎齧  
空林胸中有誓深於海肯使神州竟陸沉

夫差敗越二十一年

越滅吳十年乃伍員語

其二

鈞天夢冷紫宸春臣子啣哀社稷屯一縷血忱開白

日兩篇心誓哭蒼旻

謂前後臣子盟檄也

渡江祖逖願興晉路

海仲連羞帝秦回首故都宮闕恨滿山秋色正愁人

題拙作後

我有詩一編率皆懇切辭但寫肺腑苦不求言語奇  
矢口吐憤氣焉知詩非詩脆語剪風露叨叨兒女癡  
昂然大丈夫以身佩安危何時把杯酒大笑信雙眉

三礪

一礪二礪至萬礪盟執牛耳血爲誓靈臺空瑩白於  
秋徹底不生垂炭氣背裂齒碎志懇懇貉之天性寧  
踰汶我生一雙霹靂手終碎此虜爲齏粉天平地成  
風俗淳一統未歌胡無人

九日



眼見今朝菊又黃  
雙扉漬淚唁淒涼  
崢嶸歲月精神發  
磅礴乾坤意氣狂  
新鴈來時芳草死  
歸鴻盡處暮雲長  
後年箭主當回蹕  
始信山河再屬唐  
天平樂  
菊花歌  
年久涼昔聚幽軒古懸  
翠綠六天封寧  
太極之髓日之精  
生出天地秋風身  
萬木搖落百草死  
正色與秋爭光明  
背時獨立抱寂寞  
心香貞烈透寥廓  
至死不變英氣多  
舉頭南山高嵯峨  
與計幾餘  
餐菊花歌  
昔來清幽  
風露四四良文  
道人四時花爲糧  
骨生靈氣身吐香  
聞到菊花大歡

喜拍手歌笑頻顛  
狂憶昔我爲混沌王  
洞見末劫壽不長  
盡召群仙列殿下  
勅宣餐菊長生方  
我今化身遊下土  
一嚼清涼徹肺腑  
頓令心地豁然開  
迸出明珠耀今古  
普入變化妙如意  
能爲一切主  
中主塵塵刹刹  
黃金身未救娑婆  
衆生苦

愛竹歌

并序十月

吳中承天寺立雪軒脩竹一林極可愛  
昔承平盛時每遊其間屢詠絕句刻題竹  
上世變之後繫心大事欲此清樂不可復  
得近至西山忽見竹林脩

翠戀戀終日實不能去始知痼癖不可除也遂歌  
之

此君氣節極偉特令人愛之捨不得徧造山水有竹  
處不問主人識不識朝朝暮暮看不足感得碧光透  
雙目一旦心空忽歸去挺身特立化爲玉

四礪二首 十月

壯懷寧久淹藏六暫窮欄道病人相食時危筆不鈔  
哭衰愁裏命笑粲醉中髯清恠每如是從教俗士嫌  
其二

說殺說不醒世人良可嘆欣欣從北俗往往棄南冠  
毒露沾膚爛尖風破骨寒願身化作劔飛去斬樓蘭

五礪

宋鼎終難問元首莫死爭九州俱是淚一刻不容生  
舌在身當貴心真願必成但思湖海上誰可與斯盟

六礪三首 郊外獨遊草

一聽茶歌淚卽流 採茶歌胡曲也 更兼風葉響颼颼不堪滿

地餘殘照併與新寒合 音閤 作愁

其二

又是江空歲晚時痛思 國事獨行遲青山無語青  
天遠吐出丹心把向誰

其三

操得南音類楚囚早期戮力復神州須知鐵鑄忠臣  
骨縱作微塵亦不休

弔揚州瓊花

并序

揚州瓊花天下惟一 本后土夫人司之花之盛衰  
淮境豐歉係焉 南渡前經兵火此花亦死今遭  
大故丙子歲維揚陷丁丑歲此花又死孰謂草木

無知乎上天福正統厭夷狄於茲見矣

南土新飛劫火灰瓊仙戀國暗驚猜定應攝向天宮  
種不忍陷於胡地開花死青春禽鳥哭城埋黑氣鬼  
神哀一朝枯枿變高樹傳得歡聲沸似雷

七礪

天生忠義性習俗豈能移道在 國常在我知人不

知眼懸堯曆象心醉漢官儀

堯漢俱  
火德

前日喃喃者今

誰語及斯

八礪三首

黃道霾陰晝蝕光野浮冤氣白冥茫世無聖主天應  
哭時有忠臣國不亡萬刃攢身終莫變一誠銘骨豈  
能忘休嫌重復叨叨說未奏膚公正斷腸

其二

生得真心鐵石堅肯將識見與時遷淚如江水流成  
海恨似山峯挿入天慷慨歌聲聞屋外婆娑劍影落  
燈前篇篇字字皆盟誓莫作空言只浪傳

其三

憤氣填膺柰若何千生萬死不消磨夷齊道喪綱常

壞湯武兵興叛逆多天外遊心窮碧落風前注目寄

蒼波此時此意那容說環顧斜陽一浩歌

謂人臣篡國自湯武

始之今胡人則犬羊耳

梅花

寒結癡陰慘物華莫將憔悴聽胡笳明年無限風花  
在奪得春回是此花

九礪

忍死以待旦蹉跎歲又殘墮身囚陷阱盡命哭衣冠  
月死虛空黑春枯草木寒牀頭雄劍在白氣夜盤盤

辛巳歲立春作

正月

大辱痛於死含哀弔歲華  
叫雲聲草檄戀闕夢宣麻  
地走人形獸春開鬼面花  
年年北去婦馬上哭琵琶  
覽鏡

朝來一覽鏡抱負頗崢嶸  
貌古煙霞氣詩新金玉聲  
郊垌常哭鬼風雨自鷄鳴  
所喜不靴笠巍冠敝屣行

獨遊

五月

吾非好獨遊無與吾同者  
不行衆所行所以驚天下  
逆哉一世人昔辯而今啞  
吻涎流腥羶變尾面不赭

若曰汝爲人寧不識取捨  
止止勿多言清風生四野

十礪

屏氣處逆阱衡慮畫奇謀  
指日誓血語高空開青愁  
決志揭大法一洗天地羞  
永使臣子輩恥列僞逆儔  
美俗薰古德至治昭皇猷  
一統萬萬世海宇咸蒙休

同

一刻積一日因循忽七年

自乙亥陷虜至辛巳巳七年

孰云天道

邇不鑿下民冤海陸頻征戰  
城池盡變遷吾君幸何  
地數禱紫微垣

十一礪四首

錢塘帝王都宮闕高崔嵬盛治藹無外鼓舞如春臺  
咸淳聖人去山崩龍虎摧彈指變晦冥鐵圍生劫灰  
丈夫吐一語霍落飛風雷直排四海水併走天外來  
手濯天地殼永刳絕織埃喚醒羣盲兒歡喜雙眼開

其二

我本漁樵徒山水足嘉遯昔也爲鳳凰今焉乃鴛鴦  
反思生爲人虛食 國家飯詎甘死賊手掛口違公  
論孤忠破衆逆彌久氣彌健決當乘良機爲 國行

天憲勇往直無前一舉四海勸談笑解倒懸盡釋下  
民怨生或不就緒死當償夙願罔使竟食言刳刳抱  
長恨

其三

姬發誓孟津集者八百國當時盡棄商喜受鉅橋粟  
獨有首陽山不生周草木至今挿天高與商無終極

其四

素持不殺戒一視齊寃親今遭此大惡不報無天倫  
况聞曾子語不取姑息仁實爲不得已挺身事經綸

苟能悟昨非赦汝改而新負固變詐者我恕佛亦嗔  
直期後世後弗恐爲逆臣惟願吾與汝同歸天德淳

十二礪

攀斷龍髯哭不回鼎湖仙去下民災一身肉痛愁銷  
骨兩臉顏枯瘦入腮誓以匹夫紓國難艱於亂世  
取人才屢曾算至難謀處裂破肺肝天地哀

題明皇按樂圖

誰鑿輿向蜀行梨園弟子歇新聲及知凝碧池頭  
事難得樂工雷海清唐史凝碧池上樂工雷海清向西慟哭爲祿山所殺

憶夢哭歌

五月二十一日夜夢遊西湖上舊遊宛然行至戎  
馬蹂踐之地憶今天子不在咸陽宮大哭隕絕  
而覺遂作此歌

金輪王天中天壽赤龍夜哭玄蛇吼仙人不忍辭漢  
去青山照水生愁醜雖貧亦有買醉資甘美不入孤  
臣口死後骨消恨不消歲歲暗逐春風上新柳

元賊謀取日本二絕

涉險應難得命還倭中風土素蠻頑縱饒航海數百

心史 上卷  
萬不直龍王一怒間

其二

海外東夷數萬程無讐於韃亦生嗔此番去者皆銜  
怨試看他時秦滅秦

十三礪十首

我有一卷書

卽二盟也

仗之以爲命所言非奇辭教人歸

於正昭昭靈臺間生死明於鏡願爲大醫王普治衆  
生病

其二

窮陰有巨虵蜿蜒數千里磨牙兩毒霧聞其氣者死  
我心不回邪縱毒徒爲爾終將飛劍去一擊化爲水

其三

哀哉大數乖妖魔填虛空劫雨壞世界欲與大海通  
羣愚捫空走奪命鬼手中陰極集萬惱願天生暖風

其四

蒼蒼南山松特立孤峯巔身此至正氣性於太初前  
流泉近靈物鬼飲之亦仙况抱長生寶永蔭娑婆天

其五



大哉萬物母清淨光蕤蕤獨尊而爲帝天地亦其子  
我見我之身彈指魔王死歡喜獨自笑清風萬萬里

其六

北荒騰黑陰飛妖蝕漢日闐闐九重門老胡騎馬入

萬世熙明殿

度宗朝殿名

一朝韃靼窟

韃靼卽今賊也

江南荒野

間月黑鬼兵出

其七

嗟汝兒女曹至蠢亦孔醜面笑心搖搖欲進乃却走  
憨癡弄盲語捧酒祝鬼壽傷哉復傷哉醒眼頻搔首

其八

偶背文明時萬事暗蒼莽詔汝一世人父亡子焉往  
良心油然而生千載垂清響與道同周流光明塞穹壤

其九

王道一陵夷風俗愈卑隘至於讀書者見利直下拜  
一或持高論聚笑議爲怪誰其振木鐸與世開聾聵

其十

夙生抱一誠天亦莫能破云胡白晝中開眼而死坐  
猛然風雨生一叱萬邪挫卒使世上人子孫未相賀

題蕭梅初舊所藏錢塘王畿圖二首

六月

陰山腥馬蹂京塵鎖殺宮花不識春  
哭問錢塘江上月如今誰是去邠人

其二

撫膺喟國問蒼蒼郭喏聲中喜氣昌  
偷報故都忠義士趙家天下又南陽

十四礪二首

法駕遙巡六載餘農桑煙火頓蕭疎  
溪山大澤精靈哭赤縣神州鳥獸居  
天下黃金歸朔漠南中白骨蔽

郊墟漳泉數郡屢反正賸有忠臣野史書

其二

六合漫空一網羅驅徭椎剝極煩苛  
星辰錯亂曆無準天地陰寒氣不和  
漢室公卿周勃少河梁朋友李陵多  
蹙然發歎悲風過渺渺吳淞捲白波

十五礪二首

國家今板蕩舊物一微絲至苦說不得  
長懷病似癡人心危陷阱天理過  
著龜賴有二盟在寧無吐氣時

其二

王畿三輔地誰信捲風沙南貨北填市北人南住家  
亂招城聚虎毒入土生蛇說着未來事戰爭寧有涯  
城中今有六七虎或東或西一暮即出頗有見之者

### 十六礪

雙眼荒荒不寐時冥搜俊傑慕夷齊讖符鐵券虜當  
滅夢出玉清天亦低城裏月明聞虎過人間夜久望

雞啼溪憐舉國巔崖底誰構懸空萬丈梯

先朝常於蜀中掘得

武侯鐵券有胡滅漢留一半漢滅胡一人無及依舊朝錢塘之語當應今日之事

六月大雨後作

推上滄溟犯玉京業籠鼓怒恣縱橫青天忽破鬼神  
走黑雨驟來山嶽傾混沌重新開覆載虛空頓覺發  
光明如今清淨渾無礙一日南風萬物榮

### 二言詩

穀梁曰弔失國曰唁并序

七月

### 丞相陳公

宜中

德祐一年二月平章賈似道出師敗績丞相陳公

宜中

當國又以京庠上書議之抗疏而遁太

皇屢降詔趣入至九月始歸朝德祐二年正月

賊逼行在陳公力請三宮不肯遷駕遂與張

侯世傑劉侯師勇奉命二王迤邐南奔南海公嘗  
夢二日相鬪其一墮地不見其一墮入袖中喜得  
奇兆數數以耐字死諭諸文武百揆後勢不能統  
制張侯又疑恐左右所賣托失風奔占城俄而占  
城亦降於韃占城遣百二十人兵卒服事之寓監  
絆意又遁而奔闍婆國嘗遣使賫香一器遺張侯  
料以挾外國兵來合公未至張侯已敗棄崖山英  
去知所之先是景炎二年丁丑歲公以泉州糖鬻  
貯空名省札數千道遣戴恩偽作糖商販糖來吳

密諭使臣呂大升徧誘浙西數州平日有戀國之  
心者皆旋填名補官呂大升用心布置有法遠近  
皆孚期以戊寅歲正月二十四二十五掩其不備  
一舉得吳有姚其姓者以謀軍器于其主高氏高  
乃告于賊酋拜都至正月二十四果有領兵來者  
以賊有備俱陷賊手自正月二十三早闔城閉門  
汲爨俱絕一聞人聲賊卽擒而殺之又議舉屠城  
幸而免越七日至二月初一午後始許開門予家  
寓于吳身親此苦後呂大升等俱受極刑公令呂

大升與諸郡響應乃夾攻之亦為良策彼高其姓者身本南人反以告賊陷誤大事生靈受禍不已高之彌天惡逆可勝誅哉且聞公至海南諸國有讓王位與之者公亦不受公始五十二歲事業豈止於此或傳在真臘之間併集外國兵來徵臣昂首望東望南一旦從天而下盡復藝祖高宗境土寧不快哉

相國生東既應識海壇沙

古識云海壇沙漲温州出相近年海壇沙始漲陳公

果拜相

早觀上國光辟雍飛聲華叫雲罵姦權

上書言姦相丁

大全被竄

遠竄走天涯十年登要津文彩絢晴霞中台勢

將圻

平章賈似道出師敗績

大拜宣黃麻國步正孔棘盲塗相

牽拏鬼盜殺機弄平陸閔龍蛇黔首心不正居然中陰邪蛛絲網黃屋六宮妃嬪髮公奉二王奔脫命毫髮差瀝膽醉上帝哭斷口大呀南邦血糊地春溪草不芽鬼氣射死樹腥妖幻毒花萬痛集如蠱百怪鳴如蛙蝕盡朱垠天國寄海上槎始知上色玉潔白渾無瑕垢衣懸相印獨御指南車沍寒凍不死微微命一窪刀圭返魂丹陽和匝邇遐生擒左賢王剗

腹鹽爲貳却視舊朝士一一誰忠嘉萬古虛空中一  
僞不可加俟我王師來動地騰喧譁雷霆破惡逆  
四海仍一家

少保張公

世傑

陳丞相遵海而南懼爲人挾以授賊先托失風奔  
占城 少保張公

世傑

擁

廣王卽位于海外改

祥興一年巳卯歲也正月賊酋烏馬兒兵犯崖  
山我軍與之轉戰兩旬至二月初六我軍不幸而  
敗所餘五百餘巨艘賊軍四向圍布期必得 祥

興皇帝賴張公不肯叛勢在必死忽天上黑氣化  
爲龍見蜿蜒于空中賊軍爭覩爲大異張侯奉

祥興皇帝俄乘機死戰出賊重圍矣所存惟十九  
隻巨艘賊望洋追之數日竟不得先賊酋張九萬

戶

本亦公之姪

數數密說之叛公泣而言曰我

嗣君

置之何地耶三軍亦不肯我惟有死耳數與賊戰  
雖伶仃海島而氣實不餒非獨忠臣亦爲良將累  
遷上秩此不詳知故不書獨閔曾除少保其裨將  
周文英降賊謂公已死乃僞說邀功實未死也公

始來勤王國人俱疑之誠誤矣陳丞相張少保  
伶仃大海外人豈不能脅取以授賊二公忠烈動  
天地有德感人心所以無萌是念者今俱莫定其  
所在昔太平盛時不得拜二公於馬前一識雲臺  
之像深以爲惜但人心未改天命豈終窮耶予日  
俟之予日俟之

將軍本北人歸順年已久擢身將校中腰縮中國綬  
身潤白玉潔面獰黑鐵醜剛勇有武威功出衆人右  
一朝天柱折當晝豐其蔀陰陽反鐵炭栝椿賊杞柳

公卿文章士盡醉馬乳酒未聞天地間生死反噬狗  
幸有張將軍強哉氣赳赳生死不携異寧受奸宄狙  
平生鐵石腸明白照九有熒熒赤伏符百拜懸右肘  
謀畫入微茫僵目拇撐口死戰拓山開高擎日月走  
剖心餒龍離淋漓血雙手聖火壽綿綿凡水焉能洩  
瞬目出死關命在事非偶張巡埋骨地頑石變瓊玖  
白光射天門璀璨奪星斗英氣磨不壞生公踵其後  
播蕩大海外若子死戀毋屈指我世祖建武又乙

酉

光武乙酉歲中興爲建武一年  
今歲辛巳去乙酉歲只四年

惡獸腦百裂始識

獅子吼天風吹新雨濁劫淨無垢

辛巳夏七月

辛巳夏七月初五日正午太白燦然見太陰亦俱覩  
索曆驗其次太白躔在午兵爭周分野天下氣當吐  
敬以詩識之儲爲史官補

避暑入古寺

避暑入古寺暫爾遣騷屑心靜涼於秋倏然適清悅  
彼哉誰氏子對奕氣爭傑惜其二低手彼此蔑奇着  
旁觀發冷笑連呼錯錯錯救之不可及流視入寥廓

十七礪

我有真黃金只作土價賣陪笑徧示人竟無一人買  
日暮哭歸來反爲衆所恠安得明眼人與之語痛快

昭君歎

漢朝遠人來入使當時公卿短奇計紫清殿內一朵  
花狂風妬春吹落地命墮窮陰鬼爲侶回首玉皇紫  
清裏舊愁新愁東海深黃鸝舌破傷春事江南絕色  
天下誇元賊盡虜歸胡沙或以嫁之鬻僞爵于飛馬  
背行天涯年深樂與生子女情熱比翼忘咨嗟果知



禮義不忍去亦有一死魂還家 德祐百官人稷契  
腹飽理學縱橫說尚棄 君父從背叛乃教妻妾學  
貞烈男兒或老不曉事女子正少欲守節天生至性  
教不得時危罕見人中傑能盡婦道能誨兒王陵之  
毋王凝妻世間婦人誰及之空恨昭君上馬時顏色  
日老單于死萬里魂歸身不歸廣寒嫦娥今塵土應  
見青冢雙淚垂

十八礪

挺挺大丈夫爲世一準則如何出處間終始不明白

四皓本周人多爲漢一出不終爲周臣身與道相失  
僅安漢社稷暗墮張良術惟我則不然一身無二適  
縱別生聖人亦當死深密我出興 我朝舊都建皇  
極今力未能之晝夜禱空碧宣王車馬來一見死亦  
足

哀劉將軍

并序 八月

德祐一年十月虜復攻常州時步帥劉公師勇守  
之常州素無城壁外濠如市河僅恃排柴木一重  
而已先屢與之戰皆勝至十一月元虜大勢合圍

月餘其回回砲甚猛於常砲用之打入城寺觀樓閣盡爲之碎廿一廿二間直攻西門敵之不去四門殺入一城盡死劉侯倉卒間衣胡衣笠胡笠同十餘人騎馬以通事者給賊盜走至平江僅餘四五騎徑朝行在隨二王南奔死于南中韃賊因常州難攻深疑平江有備及得之曰平江鐵城紙人常州紙城鐵人以此可見劉侯勞苦矣浙右之人至今皆口稱劉侯之事痛其不壽不得盡其所長惜哉故作詩哀之

萬重圍裏脫兵氛匹馬勤  
王志不分旣抱忠貞讐  
敵國莫於成敗議將軍  
身前名照江南月地下心銜  
塞北雲爲痛英雄併消沒  
託詩爲史筆傳聞

### 江南絲

江南絲盡入機房欲此虛空彼富强  
鞭撻別工皆學織程量計日定成章  
驚心蟠鳳愁應死淚手攀花痛不香  
貧者只宜巖谷隱草紉榭葉當衣裳

### 十九礪

暫爾下生來落身命塵網高明氣常清  
貧賤語亦響

雙足風雲行一心山水想何時了  
國事方外適幽賞

大宋地理圖歌

混沌破後復混沌知是幾番開  
太極四方地偏氣不正中  
天地中立中國神禹導海順水性  
太章步地窮足力悖理湯武暫救時  
謀篡莽操大生逆離而復合  
復離卒莫始終定於一粵自炎帝逮唐堯兩漢  
大宋傳火德我朝聖人仁如天歷年三百猶一日  
形氣俱和禮樂脩誰料平地生荆棘風輪舞破須彌

山黑電亂下千鈞石銅磷萬舌咀梵雲玉帝下走南  
斗泣中有一寶壤不得放光動地神莫測云是劫劫  
王中王勅令一下罔不伏燕南垂趙北際忽必烈正  
巢其地一聲霹靂吹雲飛真火長生世末世山山溪  
水水清縱橫十方變化身恒河沙數天壤殼獨我志  
氣常如新

元韃攻日本敗北歌

并序

日本卽古倭也地在海東先朝嘗入貢許通商  
旅彼近知大宋失國舉國茹素元賊聞其富庶

怒倭主不來臣竭此土民力辦舟艦往攻焉欲空其國所有而歸辛巳六月半元賊由四明下海大船七千隻至七月半抵倭口白骨山築土城駐兵對壘晦日大風雨作雹大如拳船爲大浪掀播沉壞韃軍半沒於海船僅回四百餘隻二十萬人在白骨山上無船渡歸爲倭人盡勦山上素無人居唯多巨蛇相傳唐東征軍士咸隕命此山故曰白骨山又曰枯體山元賊又一道自高麗往攻倭敗尤甚虜酋敗歸幾遭虜主所殺並罰陪金銀鈔物

咸窘且怒虜主又謀復舉攻之耽羅國方八百里航倭甚近韃已奪據其國運糧調兵于彼爲餉衆窺倭之地倭有五十六州倭兵悉聚太宰府倭圖載甚詳倭人狠不懼死十人遇百人亦戰不勝俱死不戰死歸亦爲倭主所殺倭婦甚烈不可犯幼歲取犀角利小珠種額上善水不溺倭刀極利地高險難入可爲戰守計且今漳州陳弔眼據漳已久地通諸山洞山寨八十餘所據險相維內可出外不可入以一當百勦韃難算意欲攻出未能年

號昌泰未知擁誰爲主元賊力攻漳不可得又韃  
攻倭倭攻韃卒未已入火德一脉終如何諸處伏  
義出者咸有之然恐藉口大宋之名鼓舞人心實  
私爲一己之謀圖集事功此微臣朝夕不已于懷  
者也我朝列聖無失德大宋有道之長當榮  
然復興矣公孫述隗囂輩爍火也寧敵漢日之大  
明乎我又夢蘓武與語頗奇遂歌之

東方九夷倭一爾海水截界自區宇地形廣長數千  
里風俗好佛頗富庶土產甚夥并產馬船來中國通

商旅徐福廟前秦月寒

倭有徐福廟

猶怨舊時羸政苦厥

今犬羊貪猶熾瞠目東望心如虎驅兵駕海氣吞空

勢力雖強天弗與鬼吹黑潮播海翻覆大於拳密於

雨七千巨艦百萬兵老龍怒取歸水府犬羊發怒與

天敵又謀竭力必於取已剗江南民隨乾又行併戶

抽丁語凶談燒眼口竟啞志士悶悶病如蠱雖傳漳

州氣燄盛又聞襄陽已大舉割據固足稍伸氣律以

大義竟何補縱遇聖明過堯舜畢竟不是親父母千

語萬語只一語還我大宋舊疆土曾夢蘇武開笑

口云牧羝羊今盡乳仗節還漢欣欣然鬚髮盡白心  
如故一念精烈無不通天地爲賓我爲主高懸白眼  
混沌前那肯以命落塵土翻身鼓掌一笑時萬古萬  
古萬萬古

二十礪五百字

素志欲隱去號名辭筆耕偶值惡劫來眼界亂縱橫  
窮北洞窟底竄出老魔精被髮走如風四臂獐雙睛  
百竅噴毒火直射日月盲一海人髓酒五石瓠爲觥  
鬼鼓徧空響白氣幻長鯨夜叉發羣機砲砲打玉京

老仙戰股立手扶鰲極撐晝弒盤古死紫微貫攬槍  
諸天落淚雨終夜淋漓傾爍人變醜相蠡目豺狼聲  
餓虎插翼飛善類誰能攫送命納彼啖遊魂嘈寃情  
血凍天下立赭鐵蛀玄蟲雨肥髑髏腥生菌高於楹  
獨抱深痛蝥數與死相爭讀史見義事意氣如雲生  
圖窮七首見今豈無荆卿真孤匿山中今豈無程嬰  
獲得九尾龜灼紋橫庚庚大寶子傳子垂統無畢程  
高聲叫亂世聾瞽豁痼醒速卸胡兒衫仙帶飄佩珩  
身辭陷陰路火那卽蓬瀛我秉正直心明比日更明

心史 上卷 三  
豪興凌高秋磊落人之英決當勇於動持平不平  
手劈虛空開身提天地行千妖百裂死萬古一擲羸  
獨出娑婆外世界懸空擎猛飛大山來突立青崢嶸  
劫初第一峯鬼神不識名樹粲百寶花石削五色瓊  
香霏月中髓碧沁秋痕輕天上闢新國以正治八紘  
大赦統乾運平心持道衡洪福溥無疆一切命皆享  
下界齊拜舞笑賀羣相迎愧昔染腥辱悅今趨義榮  
淨脫夙骨臭瑩然澄秋泓正性本不壞生死通一誠  
逆爽殄微塵王氣光大清犀象怯漢戰草木助晉兵

周勃軍左袒杜甫詩北征 趙祀必不絕 宋禮吾

足評我土我百姓未劫心不驚天君坐靈臺誓行前

後盟

謂前後臣子盟檄也

念念歿亦呪願寶期必成口血寧有

變浩劫光晶晶

宋鄭所南先生自序

思肖生於理宗盛治之朝又侍先君子結廬西

湖上與四方偉人交遊所見所聞廣大高明皆今人

夢寐不到之境中年命於塗炭泊影鬼區仰懷

理宗時朝野之臣中夜倒指嘗數一二名相崔公與

之李公宗勉游公伯杜公範吳公潛董公槐闡臣孟

公珙彭公大雅余公玠趙公葵陳公鞞向公士璧名

臣徐公元杰蔣公重珍度公正徐公嶠潘公勃郭公

磊卿張公端義劉公漢弼章公琰李公韶張公忠恕



王公遂劉公宰蔡公範王公邁曹公幽杜公淵徐公

經孫蕭公山則陳公昉黃公自然洪公天錫范公丁

孫李公伯玉道學真公德秀趙公汝談袁公肅蔡公

抗趙公汝騰錢公時霖徐公霖文臣李公心傳洪公咨

夔魏公了翁危公科許程公公許劉公克莊湯公漢劉

公子澄詩人徐抱獨逸戴石屏復古敖臞菴陶孫趙

東閣汝回馮溪居去非葉靖逸紹翁周伯弼弼盧柳

南方春翁賓暘孟寅曾蒼山幾杜北山汝能翁石龜

逢龍柴仲山望嚴月澗中和李雪林龔嚴華谷榮吳

樵溪陵嚴滄浪羽阮賓中秀實章雪崖康孫花翁惟

信其他賢能名官豪傑人物老師宿儒仁人義士僻

在遐方異縣深山窮谷誠匪車載斗量所可盡如斯

諸君子落落參錯天下當時氣燄何其盛哉度宗

登極權臣持國士氣沮喪畏禍燃身相尚賣諛平日

挺為君子者亦舌噤若死宜其人才咸無稱焉養成

德祐莫大之禍不可救藥雖德祐後忠臣義士

亦理宗朝涵養所致者萬乘南還宗祐塵土臣

子之痛終天罔極今忍死暫生期集大事不暇以歡

情倩目調笑風月爲詩人美麗之辭疇昔 咸淳壬  
申嘗確然立志悉委舊學已絕筆硯文史謀入山林  
脫去姓字甘與草木同朽盡敬以我還之於無聲無  
臭之天向非 德祐虜禍天下無復賦詩作文矣昔  
上有聖天子下有賢公卿儒士豪傑人物我藐然匹  
夫可以隱泯於天游今而上無君世皆賊我當爲天  
地斯道之主主也者天其綱常於無窮也率有聞而  
笑之曰豈少君一人哉每厲聲應之曰正少我輩一  
人耳實萬萬不容不出爲斯道立極也歟大逆熏心

冤憤填抑目遇逆事相忤尤覺氣豪不自禁非不知  
賊之刀鋸之痛然痛有甚於刀鋸者寧忍避一身微  
痛不救天下至痛時吐露真情發爲歌詩決生死爲

國討賊之志心語心謀萬死必行故氣勁語烈殊  
乏和平興趣實非詩之正道 先君子嘗謂英氣道  
之累又謂離騷亦不得其正但以高古忠憤過之其  
以是之謂 先朝作詩皆尚盛唐製作冠冕佩玉五  
音相宣如大朝會法度森然此皆 我朝祖宗仁義  
之澤况美教化移風俗動天地感鬼神莫近於詩果

能一出誠心公道斥去僞語邪思蓋詩道必致之教  
舍是而詩恐非古聖人之所謂詩今天下人所思皆  
邪詩之根本摧喪無餘此爲何時出而言詩爲仁義  
辱甚矣果欲爲之必知所立身乃可思肖幼本不肖  
且大不孝資質頑鈍授之以學若水灌石了不相入  
先君子盡平生精力竭其所學癡呪枯木望其必  
花今若鳥雛能飛詎敢易 父母所行之轍恣謬其  
所之亂後所作詩二百篇固近於正一或不能行其  
所言願天誅之人誅之彰其不孝不忠僞語罔世之

罪使悉聞其惡皆相顧而語曰其父母如是其子如  
是吾與汝其戒之我晝夜懷懼深思遠計施於言語  
果無益不若身之於事以風天下暫乎默讐緘誓屏  
吟詠事決其必行計獨以謀之神以運之剖析清穢  
豁如天開位三綱福萬物願俾天下後世莫不知有  
君願俾天下後世莫不知有父始可以見 我父母  
平日教子之志今忘叨叨再四紬繹力主于行爲終  
身誓不求天知不求人知不求心知亦非有所利而  
爲之蓋臣子之職分當如是也若律以詩去古人法

度誠遠矣當憐所遭之時爲何如時之爲矣如是之極也夫以時論之在天不在我以理論之在我不在天時雖異卒不能違於理理至大實可以制乎時昔父母教我勿違理而行也素矣是以我自許我可必集亂世難成之事時曷能果病我耶我誓執無終極之終以終其有終期無負於國於家焉願畢天下後世之人一而行之三極之道至矣盡矣維

大宋三百二十有二年德祐七載歲在辛巳陽月望日景定詩人三山所南鄭思肖億翁後序

宋鄭所南先生久久書

前後臣子盟檄二篇并跋并詩昔分其字而九九錯綜書之又取久久之義故托其名曰久久書秘其機神其事庶幾便出入衆不疑其文且奇其留傳可以久久俟我大事成當釐爲正文激勸天下今又閱四年而事未集大痛在心晝夜不釋期於必成乃事一日興動竟釐爲正文讀之激發其志但我死有期矣恐生不能爲國家報讐死決當爲大義吐氣我昔有詩曰生或不就緒死當償夙

願罔俾竟食言劫劫抱長恨此二十字心誓盡之  
矣久久書後九跋蓋跋前後臣子盟檄也特意微  
隱爾德祐八年長至日後十三日所南鄭思肖書  
久久書正文

大宋德祐二年九月六日大宋孤臣所南鄭思肖作臣  
子盟檄曰上而天下而地中天地之中立人極焉聖  
人也爲正統爲中國彼夷狄犬羊也非人類非正統  
非中國曾謂長江天險莫掩陽九之厄元凶忤天篡  
中國正統欲以夷一之人力不勝有天理在自古未

嘗夷狄據中國亦未嘗有不亡國苟不仁失天下雖  
聖智亦莫救我朝未嘗一日不仁亂臣賊子天闕  
國脉貪官虐吏剝民命君上本無失德今犬羊  
愈恣橫逆畢力南入吾指吾在此賊決滅於吾手苟  
容夷狄大亂當不復生吾觀吾之身天地之身  
父母之身中國之身讀聖賢書學聖賢事是與聖賢  
爲徒奚敢化爲賊而忘吾君吾父吾母也欲  
彎弓射賊曷能顧母存亡欲偷生事母何以扶  
國顛覆舍忠不足爲孝舍孝不足爲忠以是遲遲

二三百日間雙睛望穿天南之雲天道胡爲尚未旋  
蚤夜以思狂而不寧淚苦流膽心赤凝血挺然語孤  
忠孑然立大義與世相背獨立無涯我 母龍鍾憂  
憤成疾旦莫無期奚生其生叫日而日未出泣夜而  
夜何長愈久愈不變愈不可爲愈爲譬賤隸婦富少  
年智誘以私彼不肯玷厥夫爲烈婦譬貧儒子貴公  
卿謀遷爲後彼不忍舍乃父爲孝子苟有異代聖人  
下舉匹夫任以天下事彼不願背主而相之爲忠臣  
萬潔一汙非烈婦小從大違非孝子一月不變三月

變矣一年不變三年變矣或者雖不甘從賊置 大  
宋已不可爲且且惟真主望非忠臣何哉婦無二  
夫子無二父臣無二君縱姬發或興亦不陳洪範書  
吾爲 大宋民 吾君之德不紂彼非姬發而夷狄  
天如之何傾有道之國夷齊不懷殷惡不臣姬發之  
聖汝輩獨不思 大宋忠厚不怒逢賊慘毒皆樂然  
媚鬼求長生術疇悟其自促乃死向之喃喃諤諤誓  
死不變者亦委天命于數僞夷狄以王胥而爲賊反  
叱吾愚執方癡謀不與時遷譽其爲聖求變富貴也

心史  
聞之心裂痛不可言 國家大讐未報天下大迷未  
寤我心大憂未釋仰無天俯無地莫人其爲人之道  
學匪詞章之謂所以學爲人人匪形體之謂所以人  
其忠孝萬世大經不逾忠孝一人忠教百千萬人忠  
一人孝教百千萬人孝生非所愛死非所畏生不得  
其道死則爲榮 父教於昔 母諭於今不得不大  
一舉而殛賊卽舊邦新之于以正天地大位于以開  
日月新光天下忠臣義士耳茲血盟願相從而興  
火德復炎炎中天乎實 父之願實 母之願表忠

臣義士於既往誅亂臣賊子於方來誓大播厥盟與  
國家其無斁

德祐四年正月作後臣子盟檄曰我被 國家仁最  
深受 父母恩最重生長 理皇聖德汪洋之中飛  
躍道化流行之下詩書理義誠明其心衣 禮樂光  
華于躬爲 三朝太平民一旦罹此禍凶禽獸其形  
乃食人食得不思 大宋乎豈意天下俯首從賊竟  
忘遽變毛角居禽獸列乃曰數也勢不可爲也理無  
不忘國也然昔之國亡必有太康孔甲桀紂幽厲哀

平桓靈僖昭之君酷虐禍亂大壞天下數十年民大  
怨慙矣而不喪。本朝人君萬無一焉故憤悶不平  
思。宋者衆寧有。一祖。十四宗至仁中國竟若  
是而已夫天理必不然也惟。我朝德澤洽人心也  
深故有李公芾李公庭芝姜公才趙公與擇趙公准  
陳公文龍趙公知發王公安節阮公正已輩俱死忠  
烈大有可觀是數人奇哉燁燁乎有光華垂清風於  
無窮今死守不失節者丞相文公天祥遁身南歸武  
臣張公世傑相與驅馳少傅陳公宜中挾。二王而  
主之。三宮狩北未有還期。二王奔南未奏膚公  
上下錯亂天怒神怨正臣子報。國忠義自見之日  
虎兕區人域吾與汝皆腥涎中食盍反自思焉古今  
忠臣義士英壯激烈高風凜然吾亦人也獨不能爲  
之乎雖。父母遺體不敢毀傷坐視。君上蒙大難  
不救又棄。父母所育之身化犬羊類生不爲全人  
死不得全歸終古啣冤痛于罔極何忍負。吾君何  
忍負。吾父何忍負吾。毋不爲君子終身忠孝乃  
本分事一毫悖謬爲大惡人。父授我語也吾。父



立節剛潔見理極明苟在逆知必歿于此賊又母  
氏教以唯學 父爲法極拳拳深望 中興事期我  
大有爲當世若不殄逆類炳 炎圖是違 父母遺  
訓爲不孝子詎不大逆生爲吾 大宋之民生爲吾  
父母之子實一世良遇也倏遭瀕洞腥汗 社稷  
淚盡心破安敢有生當與賊大決一勝終其爲人臣  
人子之道或曰子身不過五尺長弓挽三斗強言空  
無實力孤不支宜箝口命餘生不然子之肉醢矣嗟  
夫身可殺心不可殺形可泯理不可泯平生讀 父

書箕而不弓裘而不冶然至剛至大之氣則塞乎天  
地間自反而縮果其往一舉中度天地光明開 大  
宋兩中興之運緝 先王萬年文明之治仰拜吾  
君九天之上俯拜吾 父母九京之下臣子之事或  
庶幾乎今雲霧晦塞草木淒苦四顧空空舍我其誰  
臣子盟檄所以作曰臣子盟檄何義臣不敢忘 君  
子不敢忘 父母誓吾心不變曰盟勸國人皆忠曰  
檄作於 德祐二年九月晝夜焦思欲舉大事何期  
舍垢隱忍又閱五百日圖其大當重其事謀其成不

計其日又懼久而或弛復喜勇於決行斷斷然無負  
人臣人子之事吾違茲盟雷極其形理誅其罪人違  
茲盟惟理所在惟公乃行人心天理克復則明敢率  
爾舊民羣興萬動協心丕作恭聽號令勦茲強醜聿  
新 有宋家邦速觀乃有成俾厥今之人各正天倫  
亦期彼後世咸罔違是盟是年九月復跋之曰我幼  
愚頑無有慧性凡一毫以上非我 父懇切教之今  
無以明大義長而拙懶不解生理凡一日之生非我  
母勤儉育之決無以至今日家庭之訓歷歷胸中

天可窮其高地可極其厚吾 父母之恩大不可而  
思也二十二歲無 父三十五歲無 君三十六歲  
無 母又三十八歲無子今爲無君無父無母無子  
之人傷哉我又聞我 父曰生死事小失節事大臣  
之於君有死無二且謂我 祖我 父傳家惟忠孝  
而已庸授於汝母忘 父言我屢嘗竟夜鰥鰥悲泣  
哽咽以 國以家反覆思之 君師所教所育我者  
如此 父母所教所望我者又如此今所爲乃若彼  
安乎忍乎此臣子盟檄不容不作旣盟之又盟之實

有大不可已者誓行臣子當然之事也夫螫龍一出  
頃而霈雨壯士長嘯割爾生風前後二檄奚爲空言  
時一誦之心勇氣動天日愁變儼若坐雲叱空手舉  
滄海淨滌大地腥穢頓復清明之天意頗快然故申  
之以跋淬礪乃志決其必爲不然縱累千萬篇空文  
無益也今惟以行之一字痛誓于心終施於事將與  
天下終始同爲大宋民期不渝初心焉後之覽斯  
文者察其深切痛苦之心亦當爲之一下淚也九月  
望後復詩以盟之曰死亦烏可已丹心闡大猷恭承

宋父母教用剪 國家讐日被四洲夜天開六幕秋  
終當見行事不與世同流時

大宋德祐四年戊寅歲冬至日 大宋孤臣三山所  
南鄭思肖億子泣血誓心而書

越四載 德祐八年冬至後釐爲正文久久書  
舊文茲不更錄

宋鄭所南先生久久書後九跋  
 一  
 此一卷書凡二千二百三十四字昔先夫子授我  
 曰真奇書也名曰久久書由是行之可以為天地立  
 極為生民立命為萬世開太平今未可發其秘久久  
 觀之當自通其文比潛心數歲終莫句其辭支離蹇  
 弊罔測何文何義流離顛沛與此書同死生數矣不  
 敢忘先夫子所教故今存焉噫山林禽獸之天江  
 海魚龍之天君君臣臣父子子乃吾之天今所聞

宋鄭所南先生久久書後九跋

一

此一卷書凡二千二百三十四字昔先夫子授我

曰真奇書也名曰久久書由是行之可以為天地立

極為生民立命為萬世開太平今未可發其秘久久

觀之當自通其文比潛心數歲終莫句其辭支離蹇

弊罔測何文何義流離顛沛與此書同死生數矣不

敢忘先夫子所教故今存焉噫山林禽獸之天江

海魚龍之天君君臣臣父子子乃吾之天今所聞

所見所交所言所行所止所飲所食其吾之天乎其  
非吾之天乎將與草木歸枯朽乎終與日月同光明  
乎一係于久久書焉行將絕世事委形死志通晝夜  
寂坐禱于靈臺之天必能冥悟其旨吾當爲天地立  
極爲生民立命爲萬世開太平又當大書特書其書  
以風後世云巳卯歲立春後一日三山所南鄭思肖  
億翁書

二

我之命受于 父母之天我之學得于 父母之傳

縱萬萬鬻其肉亦弗復遷之故不敢與天下人相遊  
於同惟守天理於至久而立於獨以我 父母不與  
天下人父母一其立心與天地一與古聖賢一敢爲  
不肖子辱之哉大紀淪敷同風一汗知我者惟我而  
已卽我律我而我且不中我乃以我之律而律於衆  
人宜乎與人日益踈背夫今之人吐語無奇氣爲時  
所變化叱古直拜富貴萬其心一於利初若剖肝膽  
相授熟窺於久實不然坐空一世悉莫我之合或相  
與游終非心於吾之天者也此書實難其托欲碑其

一立萬山之上函其一沉大海之底明揭大義爰鎮  
覆載間而語語癡錯容色稿悴死有日矣形骨固壞  
然有不可泯滅者在焉茲其位育天地萬物於無窮  
也耶已卯歲旦三山所南鄭思肖億翁復書

三

厥今三綱五常之道盡廢人而禽獸爾孤立無朋唯  
心自語 我父剛方純正行三綱五常之道者也萬  
不肖其一二烏取其爲人子念念思之心痛如割今  
當誓死行其所教終期於肖不然 我父教我何事

已卯三月望思肖復書

四

朋友居人倫之一今天下大壞風俗一爲之汚染欲  
得相與語吾語者竟不可得伐木麗澤之義殆將廢  
矣抑天下果無人乎故出則獨遊歸則高臥爲世嫌  
罵指以爲癡蒼天蒼天我讀我 父書者也浩歎激  
發以手抑胸血漬兩背乾坤若變色凄然欲風雨凜  
乎其不能自存忽作而言曰天道不常晦冥終有青  
天白日之時吾何憂哉

心史 卷五  
我父今逝十八年矣昔在膝下時教我極嚴隨事陳義啓其昏頑行坐寢食無一事一時而不教且痛加之鞭撻直欲吐其心納我胸腹間使其速肖於人譬如種種子于枯壻之上今萌芽者百不一二舉其大要則曰不能事親非孝也不能事君亦非孝也不能立身亦非孝也何也辱於家也故立身為人子之終事孝經曰始于事親中于事君終于立身此之謂也汝不行吾之言汝則非吾之子 我母亦語我曰汝

不行汝 父之言汝不如死至今歷歷耳聞髮立汗下 父母之言一出諸口卽心服而行之者孝子也今悖 父母所訓委身汗雜爲名教罪人願天下之爲人子者悉以我爲戒家國其庶幾乎况我 父遺所著書數帙又注易甫及六十卦而逝夫繼志述事實人子之責今天昏昏日茫茫正切切然爲天下大事計心夢飛亂卒未暇爲我 父足其遺書孟子曰不孝有三無後爲大我又犯之我 父遺書終授之誰耶我知雷霆必誅我矣掩面一慟昊天罔極

人道立則天其所以爲天地其所以爲地萬物其所  
以爲萬物人之道苟不然天地萬物之道亦幾於廢  
矣蓋天地萬物不能自爲天地萬物必以人而天地  
萬物之人之道大矣哉日輪西傾覆載咸夜羣生冥  
塗索行莫知所向可哀也已速吾之 帝出乎震開  
天下曉使昭昭然行大道中人道立則天地萬物咸  
盡其道吾事畢矣右三章皆感歎久久書而作滔滔  
有懷言之不足故言之而又言焉今併書之已卯冬

至前二日所南鄭思肖敬書

七

今之爲人父者能生之不能教之惟慮無財遺其子  
苟能教以學業不教以仁義曷爲父間有不孝者亦  
詬父曰不遺以財使我終窮至謂天不生我于富貴  
家爲怨也豈父子之天耶嘗思百工之人富者知遺  
財與其子貴者知延賞與其子人君知以天下與其  
子獨我 父以道授我庶乎成人故我 父之恩過  
於人君以天下與其子獨下可得而有道不可得而



心史  
聞以天下與其子歷代人君莫不然以道授其子千  
百世不一見父欲聞道且不可得奚以授於子世之  
父不多老聃輪扁也縱有之尚不能喻於子道之難  
聞如是哉我聞道矣一天下之事皆小之但知我  
父所授之道爲至大白刃加於身實不懼曷以變之  
昔本大不孝今知改爾得如是者非我能也實我  
父之力也故生生死死一以久久書爲心意悟天還  
吾道亨矣昔羅仲素論瞽瞍底豫事曰只爲天下無  
不是之父母陳了翁聞而善之我繹思其言直與六

經相表裏今天下人一之爲惡道本無間斷使無知  
者爲時所瞽痛可憫我有我父之道在了然不惑  
獨立不懼豈易至是益信天下無不是父母之語爲  
至論惜乎生後不得見斯人一拜之世道錯倒今與  
誰語其惟仰蒼蒼一歎乎辛巳九月廿四日所南鄭  
思肖億翁書

八

吾聞有志者人莫破之鬼神莫破之天地莫破之生  
死禍福莫破之夫如是我知我久久書必開大明之

天終集厥成也志與道一萬古如新敢再拜焉敬勒  
爲誓辛巳良月初六日所南鄭思肖億翁書

九

我書久久書後凡八作猶不能已於已也所以不已  
者何我父之志未伸也我父氣如烈日秋霜其  
嚴行如精金粹玉其潔今洞觀一世人竟無似其毫  
髮者我欲學之也自始逮今愈學愈不肖仰而望之  
巍然其天平始教我爲君子也今小人矣易形革面  
躑躅獸走得罪天理不齒人類如之何不使我哭泣

摧抑痛割心肺晝夜悔恨若莫能救人莫不有子其  
子未嘗不肖父誰謂我父有子乃如是爲人笑罵  
直累於先厥罪爲大深思我父昔日鞭撻不可復  
得痛哉痛哉誓自今始心無他思目無他視盡力死  
行我父所行之塗雖生死禍福來悉不敢避一念  
動于中天地鬼神昭監在前或敢薦違家法我父  
終不瞑日於空冥間鄭思肖盍深思之今恥事虛文  
此爲絕筆之誓辛巳陽月初八日所南鄭思肖億翁

西漢絕十八年景帝之子長沙定王發五世孫光武  
興漢其派實不出於武昭宣元成哀平諸帝之下東  
漢絕一年前漢景帝之子中山靖王勝之孫昭烈皇  
帝興漢其派亦不出於東漢諸帝之下 大宋開中  
興之天或不幸而如是亦寧不可乎惟 大宋一祖  
十四宗聖子神孫之後亟圖之微臣雖不才敢不盡  
生盡死以效驅馳決不食言

大宋德祐九年四月七日臣鄭思肖敬書

5012

